


М. Задашев



ТУБОНОМЕ

М. Дадацев



(Мэхсерее ихдилотгъо).

Дагестанское
книжное
издательство
Махачкала — 1977

Т(тат)
Д14

Д14 **Дадашев М.**
 Тубономе. (Мэхсерее ихдилотгъо).
 Махачкала, Даг. кн. изд-во, 1977.
 68 с.
 Исповедь.

с(тат)

Э и сборник эн жогъиле прозаик тати М. Дадашев дешенде оморет е ченд ихдилотгъо ве новеллагъо. Ихдилотгъо ве новеллагъой эн у гъисдуьт эз товун одомиети, боворини, гъэрдхунди э пушой коллектив, эн дуьеки, эн хэлгъ. Э омбордеки эн угъо автор бирмунде, очмиш сохдени кемсуьгигъоре, комигъоки мешет биренуьт э иму, э кор, э зиндегунни му.

Д $\frac{70303-200}{M 123(03)-77}$ 71-77

© Дагкнигоиздат, 1977 г.

Х О В Э Н Г Ъ Э Д М И Л

Гъэдмил, кладовщик эн база «Снабсбыт», е жонлуье одоми, келе сер, фирегье сифет бу. Виниюш, чум мерасо, ченд е хубе яралмаси бу. У уьткем, дуьлшор, гьечи ниетгьо-метлебгьою гьеме бегьем бире одомире хуно, десгьо-пойгьой хушдере шушде, нуьшдебу э сер суьфрей шохьонгуми. Олхогьин, тэгІди несохде, Гъэдмил эз чореке э пейле декуьрдени э хуне сохде шоробе, песде вегирдени тикей вобуржунде кутуме э чол дешенуьгьоре хуно, дешендени э лэгІэй хуьшде. Эз у бэгъэй, хьэрмэхь э песой ю, фуьрсорени у э лэгІэй хуьшде, десдей савзире, гене жэгІэ, э лезет ве марчемарчезов сер гирдени эри жавуьсде. Угьоре хурде-фурберде верасде бэгъдо Гъэдмил ведорени пейлей шоробе. Песде э гъэд нимсэгІэт э лугъонде чолеки декуьнуьгьоре хуно «хуш-хьэллол ю», у пес-песоеки декуьрдени э шуьгъэм хуьшде е согъэ бушгъоб вобуржунде кутуме, тозеле, герме-герм е гиргине нун тонуире, хэйли савзи-пиёз, гьемей чорек шоробеш. Эхириш хуб хус, сирои бире верасде бёгъдо, Гъэдмил, сере тик гирде, игид э гІожиз денуьшугьоре хуно, э лой кук хуьшде дениширени. Кук эн у э хьэрмэхь хуьшдерезов, комигьоки эз и е ченд руз пушо верасдебируьт дегьимуьн классе, эденбируьт дуь э екирезов гоф сохде. Эз хурде чигьо гьингьине величире э Гъэдмил, у суьпле хэнде сохде, пуьрсирени эз угьо:

— И... ишму, хое сохде керге хуно эхи гье э гъуьд-гъуьд дерит, гӀэилгьой ме? Чуьни бегем?

— Школаре верасдем, бебе, имугьой эдее э екире-воз гоф сохденим э же бураймге эри хунде, — жогьоб дорени кук Гъэдмил.

— И... и... песде?, — гене гьингьине вепичире э ю пуьрсирени Гъэдмил.

— Ме э политехнический институт эдее гуфдире-нуьм, оммо кук ишмуре педагогический воисде, — жугьоб дорени хьэрмэхь кук Гъэдмил.

— Дуразруй бебе-дедей ю, эз хэри хуьшде, — гуфдирени Гъэдмил, дендуре вехорунде-вехорунде. — Учитель-мучитель, инженер-минженер кини. Игьош эри ме сенигӀэт офдет! Ишму, худо мееро, кур нисдит, э пушой чумгьошмуни: е пара учительгьо эдее пиражки фурухде, е пара агрономгьо, сипре хэлете вокурде, эдете э туку алвер сохде. Эйчуьни гьечу? Гьич ишму эришму фикир сохдейт — эйчуьниге? Ишму имугьойле, худо мебуро, гӀэилле, чуьклеле нисдит, биё верасит. Угьоре воисдени пул омбар сохут. Пул омбар сохде унгъэде э хундеи кор не вери. Ини, дур нерайм, вегирит винишит мере. Ме кооперативный техникуме верасдем. Чуьтамиш хундемге, ченд пура чемадангьош бердемге, чендгъэде пулгьош хэржи сохдемге, эхирки, чуьтамиш гирге, коргьой гуьгьоре хуно «юхуле-будуре» варасдем техникуме, «именно» кооперативный техникум. Худоре шуйкуьр шеш гӀэилиш келе сохдем, хундеишмуреш бегьем сохдем, эри хурде-вегирдеш гьисди, меево ужире руз э сер ме эри себехькине юхсуле рузиш кем-биш гьисди. Дие чуй воисде мере?

Туй эдее гуфдире «учитель»... Тфу! — эхир эз дендуй хуьшде тикелей жэгӀэ ведешенде, туй шенедени Гъэдмил, екем гьингьине ю поисде. — Эгенер ишмуре воисдениге нун ишму гьемише э руьгъэн дебу, э гоф ме дениширитге эз «торговый» бэгъэй э е жигеш ишмуре рафде герек нисди.

Эз ижире гофгьой Гъэдмил гІэйлгьо перт бире мунденуьт.

— Ме э комини книгиге хундем, гьейсэгІэт э ёр ме нисди, лелей Гъэдмил, — мугу хьэрмэхьлей кук эн у, — э е вилеет ижире гІэдот, гьонуни: ки дуьзди сохдениге, э кефел гІэсб енебуге хэр муьгьур-пичет веноренигьоре хуно, гьечу э дес эн у муьгьур веноре, гьеме дануь у дуьзди гуфдире. Ужире одомире песде э е жигеш э кор нисе вегирде.

Гъэдмил хуни-хуни дениширени э кук.

— Гофгьой эн и хьэремзедегьоре денишит ебо! — гьэгьри-гьэгьри, гІоси бирере хуно гуфдирени Гъэдмил. — Игьош эри ме расди-дузи гешдегор бири... Э иму, худоре шуькуьр, ужире гІэдотгьо, гьонунгьо нисди. Эгенер туьре э дуьзди-дургуни гирдегор небирге, ихдиёр нисди дуьзд эри хунде. Э метелегьо гуфдирени: «Гомиш бала зендге екиш нидануь, оммо хое сохдей хуьшдере керг э сад гьунши-мэхьэле мэгІлуьм мисоху». Ишму эз ме е кем книг омборте хундейт гуфдире, ишму эришму гьечи веровурд сохденит, егІни, эз ме омбар дануьсденит?.. Эришму гьейсэгІэт зиндегуни кейф, асанта, мэгІни хунде, зурнов-балабан зерере хуно оморе. Оммо зиндегуни — есиёви, есиёв. Э зир десдар эн у офдоренге мивиним чуь жире мэгІни михунитге...

Песде диренге, ки эз гІэйлгьо гоф нисе ведироморе хьэрмэхь кук ю, юре гІэйб оморере хуно, гьирмизи бисдо, у хомуш бире, угьоре несигІэт дорере хуно мугу эз угьо:

— Бовор сохит, гІэйлгьой ме, ме зиндегунире лап хуб дануьсденуьм. Омбар дирем, омбар синемиш сохдем. Э зир десдаргьой есиёв нэгІо, ишму муношит, э зир сенгьгьой дохьоригьош дебирем. Эз у буш, буше гофгьо гьичиш нисе бире. Одоми «гІэсел!», «гІэсел!» гуфдиге, эз у оморе лэгІэй одоми ширин нисе бире. Ини иму дуь екире себэхьмунде диренге гуфдиреним дуь

эски: «Себэхь туь хэйр бу!» Чуйни, егІни, мэгІэной эн и гоф? ЕгІни себэхь туь э пулевоз, э хэйревоз гердо! Эн суьфден метлеб одоми пул кура сохде, куьф хуьш-дере пур сохде миё бу. Уре верасит эришму.

ГІэилгьоре воисдембу гую э ГІэдмил метлеб эн инсон э гІуьлом э шефди-дургуниревоз, э хьисоби-бед-хьисобиреоз пул кура сохде нисди — одомиетини, э номус, гІирьетеоз зигьисденни, эри хэлгь вилеет хэйр овордеини, оммо угьо дие э у гьич е гоф нисе гуфдиренуьт, э сер офдоруьт, ки ГІэдмил э гІуьмуьр хуьшде э «зир десдар есиёв» дебригеш, э зир «сен-гІгьой дохьори» дебригеш, хосиетгьо, дивэгІгьой эн уре дегиш сохде нибу, гуфдире гофгьошу э гуш эн у нидавав, унегуьре дие гоф несохдут, лэгІэшуре гир-дуьт поисд. Оммо ГІэдмил эри хуьшде гьечи вераси, ки гуйге у гІэилгьоре э гофгьо-несигІэтгьой хуьшдере-воз дануьсд э рай оворде, э «эгьуьл венгесде», дуьл олхоин, шор бирере хуно мугу, лэгІэпара сохде-сохде:

— Дие имугьой вессит, вэхд хисереи...

ГІэдмил мивэхизуь эз жигей хуьшде, гьобоне, вемасире шуьгьэм хуьшдере, гІэзизе баларе хуно тимор сохде-сохде, нуьгьмегье бордоре зен пой нуьгьоре хуно, гурунд-гурунд пой норе, рафдени эри хисире. Эз ним сэгІэтиге бэгьдо эз ГІэдмил хисирембугьо хуно е келе сес эн пих фит эдембу оmore, гуйге хоригьо, диворгьой хуне эдембируьт лерзире.

ГІэдмил гьечи хурде, вемасире шевгьо ховгьо омбар дирембу, оммо у гьейсэгІэт дирембугьо хов лап ежирейге хов бу. У э хов миденишуь мивинуь ю э кори, эри кор верасдей эн у дуз е нимсэгІэт мунди. Пушой эз кор рафде у гозетгьо, журналгьоре вегирде эдембу хунде, фегьм сохде: у э пушой шинохгьой хуьшде гьечи эз гьеме коргьо хэбердор бирегоре одомире хуно бирмундембу хуьшдере, песде уре нисе воисдембу эз «хьол-овхьолет» гІуьлом хэберсуьз бу эз и недане одомигьоре хуно.

Гозетгъо, журналгъоре фегъм сохде бэгъдо, Гъэдмил сэхд сохдени складе, шляпаре э куьдуьре хуно келе, гиргине гьисдигъо сер хуьшде веноре, э тегъни-мирегов ведироморени э куче. Те ебо э хуне оmore, у гьемишеинегъой хуьшдере хуно э телефон-автомат зенг мизенуьт эри зен хуьшде эз хуне чуй хэбериге. Сер ебо гъечи у зенг зере, зен эн у гьемише жогъоб мидо «хуби-никини» гуфдире. Оммо и дес сес зен э гоф сохдеки э уревоз е жире бу. У мугу э телефон эз шуьвер хуьшде э хуней эн угъо е милиционер оmoreбу. Гъэдмиле эри гешде, э дес юш е келе товунде муьгър-пичет буьруьнжи дебу.

Ижире хэбере Гъэдмил эз зен хуьшде шиновусденге, ранг ю мирав, суьпенж мизенуь. дуьл ю миверав-муфурав, мугуиге еки уре э зир сине дешенди эдее пиш сохде. У эз будкай автомати ведироморенге мивинуь э кин ю пой вечире эдее е милиционер оmore, э дес юш е товусде, суглей гЪэтоше хуно гъирмизи бире муьгър-пичет буьруьнжи дери.

«Бебей ме вой, хуней ме вечаруьсд! — эз мунде жигеш ранг ю зерд бире, э дуьл хуьшде мугую Гъэдмил. — И гъе зен ме гуфдиренигъо милиционери. Те у мере гуьрде, у товунде, гЪэтош гирде, муьгъуьре э дес ме веноре, ме вирихунум хуьшдере эз кин эн у.

Гъэдмил э вирихдеки, видовусдеки эдембу фикир сохде эри хуьшде: «Кини мере фурухдегор, э дес до-регор? Э гъэд корсохгъой иму угъреше ужире одоми недери. Эже вирихуьмгеш нисе дануьсденуьм. Эле! Хубчи э ёр ме омо! Видовум дерам э хъэет завсклад ме. Ме эз хэлгъэ фурмунде, дуьздире пулгъоре э уревоз хьэрмэхьи бэхш сохденуьм, у эз ме омбартеш вегирдени. Имугъойле бигьил уш э ме кумеки сохугу, э дес ю муьгъуьр верафде, э пушой хэлгъ-жэгЪмет, эл-вилеет биёбур бире ние воисдеге уре...»

Гъэдмил нефес ю вепичире-вепичире э лой хуней завсклад вирихде оморени. Гъетте Гъэдмил э ен хуней

завсклад оmore расире, у э зарбевоз куфдени гъопуй эн уре. Завсклад гьетте дер гъопуре вокурде, Гъэдмил шишире дерафдени э хъэет эн у, шуш нефес гирде гуфдирени э тасире сесевоз:

— Коргъо шифи. Э песой ме милиционер эдее видовусде эри э десме муьгъуьр-пичет веноре, ме дуьздуьм гуфдире. Эри ме зубош е чоре оф: э дес ме веноре э дес туш мивенуь, гъеми э гъеземет миофдоним, гъемиге эз биёбури хилос нибошим.

Эн завскладиш гъе усэгIэт и гофе шиновусденки ранг ю бирени зип зерд, песде пелтеке хуно, демундедемунде гуфдирени:

— Туь гъечи денуьсдени, туь мере доренигъо пулгъо гъеме эри ме мунде? — шефденово хэндуйсде гуфдирени у эз Гъэдмил, — Ме омбарденки эн угъоре директоре доренуьм. Унегуьре видов бура э ки эн у. У эз иму дилбоштей, гIэмелдантеи эри эн и коргъо. Эз у гу, эгенер уре нисе воисдеге э дес юш муьгъуьр верав, бигьил имуре хилос соху.

Гъэдмил эз хъэет ведироморемунде э е зарбевоз видовусдени. Оммо милиционер э торики суьфде вир сохде уре, песде гене офде, сэхд видовуьсдени э песой эн у. Шуш-нефес Гъэдмил лап сэхд вечиребу, гуйге гъейсэгIэт синей эн ю лов мибу, гъемей жендек, серсифет эн уре гIов-эрэгъ шиширебу. Чорей эн у мибисдоге у гъейсэгIэт хорире пара мисохд э хори мидерафд. Гъэдмил э видовусдеки эдембу эз хъэележигери, гъэгържун хуьшде сер-мазалай хуьшдере куфде, бед-беде нифригъо сохде, ки дуьзди-дургуни эн уре очугъ сохдиге, уре э дес дориге. Эз елойге у эдембу вемасире, гъобоне шуьгъэм хуьшдере нифри сохде, у э ю мешет бирс гуфдире эри зури-зури вирихде, пэхъни бире эз милиционер.

Гъэдмил денишире диренге, ки юре дие эри видовусде гъувот немунди, те хуней директор расире хэйли рэхъ мунди, песде гъеле кидан директориш э ну-

бой хуышде э ки эн ки мигылуыге уре видовусде. бирден эз хуышде дес вегуыруыгьо одомире хуно, мипою э минжи рэхь. Гье и туытем милиционер Гъэдмиле гирде, э дес ю деbugьо товунде муыгъуыре—пичет буыруынжире э е зарбевоз веноре мишишу э сер дес кладовщик Гъэдмил. Эз у эз яралуь бире хъэйву сес ведировгьоре хуно, е келе божэхь миведиров. У эз сес божэхь хуышде хэбер бире, ебо терсе-терс э иловле чуме-чару мисоку, песде дануьсденге, ки гьемей эн и коргьо е сэгъэтойге э сер ю омorigьо э хов бире коргьои, у екем олхогыин бирени, оммо дие те себэхь эз дуьлпесои, дуьле дэгъ-дэгъэи хисире нисе дануьсде. У гьечи себэхь э чум дире вэхуьшдени эз хьэлов. Э дуьл эн у ченд жире фикиргьо, мэхьшевогьо оmore эз и «мурдале» хове дире эйло. У эз хьэлов вэхуьшденге серсифет эн у, гьовой эн у эз и гьолок, хэсде бире одомигьоре хуно бу. У э хьэёт ведироморенки, кук хуышдере дире, огол зере овурдени э ки хуышде, десе э сердуш эн у веноре, гуьфдирени: — Дануьсдени чуьниге, хэлеф ме, гье э у туь гуьфдиренигьо педагогический институт бура эри хунде. Гьечу хуби, дуьл олхогыинини...

Т У Б О Н О М Е

Э пушотеине взхдгьо вокурде оmore жигей шегьер иму, ижире хьэътгьо кем не домунди. Хори хьэът дечире омори э фирегье жерхгьой сeнгъэвоз, билогъ глови э ён гловхуне. Гьетте э хьэът дерафде эз гьер дуй тараф гуьнжунде омори пилонконгьой тэхдеи эри э дуй-имуьн тебэгъэ верафде.

Гьовой шохьонгумигьо, гьиз-гьине чуьшмей гьеминони фироморе пэхьни биренге э песой гьэдимие гьуьндуьре боругьой шегьер, э звери тебэгъэ зигьисдегоргьо, эз бугъунти нефес кешире не дануьсде, ведироморенуьт э дуй эз еки жейле небугьо болхунгьо, э серини ве серхини, эри ихдилот хоккей е небуге эн футболе сохде, гоф эз гоф ведироморе, э мэхьтели ве гьэжойбиревоз пуьрсиренуьт дуй эз еки, чуь бисдоге, гье-еки и буле жэгьгьой дерьегье — Каспияре?

Ооммо обмаре взхдгьо гье эз суьфде ихдилот раби Оврум вероморе, чуьнки имугьой у и е ченд сали, хьэшоети не сохум, гьер шев вогошдени э хуне кефлуь, донорени сере э зир хинике глов билогъ эри ишор бире, песде, екем э хуьшде дироморенге, фуьгунде-фугунде дерафдени э хуне.

Гьэилгьой хьэът, гьетте пиёне рабире дире, гьемееки хунденуьт мэгни:

— Раби гене гьисд пиён,
Рэхь рафдени ёне-ён,
Ебо виниш туь Мурум,
Чуьтамиге хьол Оврум.

Имбурузиш, диренге хьол Овруме, чуйтам у, нимаз хунугьоре хуно, э пушой билогъ э сугъре зани нуьш-дебуге, е гъундуьре лэгъэре пире мерд, куьгъне хьомбол комбинат шегъери, кук коминики и песини вэхдгъо сер гирдебу ичкибазире, туьнд бире, гуфдирени:

— Вегирит винишит! Иму гъеле мэхътел мунденим, жогъилгъо сере э пиёнискеи эри чуй доноретге...

— Кук ишму, бэхшлемиш мисохит, гъеле ужире нисе гьенжирегъо...о, — э руьхшендиревоз гуфдирени пуре, гъуьядуьре синелуье гъунши, хэбербере зен эн е мэхъэле.

— Гьеркиш гоф сохд, сохугу, оммо туь лэгъэре ги, — тоб не доре, гуфдирени нечогъэ зен хьомбол.

— Туьш эри ме рэхъ норегор бирей, минежибе делило!?

— Делило, туь хуьшдени туьни, чухуткее сине, — гуфдирени синелуье зен, — гъэруьсе зиндегуни не дори, ведекуьрди, имугъой эз ехэн кук дес нисе вегирде...

— Весси, весси, лэгъэй туьре ги, лэгъ-лэгъ, — гуфдирени е мерд гъунши, коминики унгъэдер чоьгъ бу, мигуиге э гъэрей сер не жендек ю гъич герден не дебу. — Иму дануьсденим эри чуй дуьл сухуни кесе сохдениге туь. Ха...ха...ха...

— Сес туьре бурр, вемасире хуьрс! — хъэрой сохде, гуфдирени гъуче гъурбуни, элли-киршон бирембугъо духдер синелуье зен. — Хуб буки э кор-корде мива-рафдигъо, эз гъечи хизе пур сохде вор дореи.

— Гъечуни?! — шив шенде рафдени э сер жогъиле духдер зен эн чоьгъэ мерд. — Эй гудил нэхуьти, муш дерьёгъи, бед-бэхде куче герд, бижки. Гъич эз ки биригеш дануьсдени?.. Имугъой эри кук гъунши мэхъэ-нефи сохде, уре эз сер ведешенде воисде туьре?!

Э сес жевгъ женг, эз нуьшде лулегъой ишу ведироморембируьт э хуне домунде гъуншигъо. Шиновусде оморени биразие сесгъо! «гъич форигъэти вегирдеш нигъилуьт», «э хунеш динжи нисди».

Э гъэриш е ченд минут женг гирдегоргъоре не мунд гыч е пэхьникие суриш, серкуши, дургуни не хэбер-бери гъувотлуь бире чаруьсдуьт э расди, беди/зеве р дес бисдо эз ники, оммо... себэхьмунде екиш ни гуфди э и хьэёт женг жевгъ бири гуьфдире, те е гилейге гьем-ме фурмуш мибисдо...

Раби Овруме, гириге, тахсиркор эн и женге, эз гыч кор хэбер небу, у, гІэйбиш буге, тен-тенбирэхьне дегешде хисиребу э кровать хушде.

Сеимуьн сал бу раби Оврум эз хуней худо пиш сохде оморе. Нум рабиетире е хьуьрметиш не мундебу — гьечу мундебу лэгъэме хуно, серкуши ве хуьрдире хуно. Фамилия юре, эз зуревозиш дануьсдегор не бу, тек-туке дануьсдегоргъо угьош нисе гуфдирембируйт, чуьнки у э е жигеш кор нисе сохдембу, ве не сохдембу э гІуьмуьр хуьшде.

Эз хуней худо ведекуьрде омореи раби Овруме лап усоле гъозиегъэдер бу, комиреки келегъой жэгІмет пэхьни сохдебируьт э гІэрей еки, хэлгъ не дануьт гуфдире, оммо ишуш хьофдбо э худо шуькуьри сохдебируьт, хилос бисдорут гуфдире эз биёбурчие раби, беднум сохдебугъо хуней худоре. Себег ю у буки и песини гиле раби Оврум э сер гьихэл верафденге, гьемишеинере хуно. е пейле не вешендебу, и дес кор расиребу э литиргъо, ве э жигей «омин» жогъоб доре у жэгІмете хьофд тебэгъэ нифри сохде бу, ве буругъ зере верэхширебу.

И хьол рабире е келе шегьер гьемеш дануьсдебу.

Гьечи раби Оврум, э огьиле вэхд хуьшде, домундебу э куче. «Бироргъо», эз хуней худо, сурули сохде, гыч пенсияш не норут эри ю.

Э жофо ки раби хутеи не бу, уре эри жофо кешире екиш хуте не сохдебу, шуькуьр э худо, пул оморембу вогосире э раби, мужине э сер ширини буравгъоре хуно. Оморе-оморе тешinei ички гужлуь биренге, герек бирени пул, раби сер гирдени, суьфде гІэйбе-гІэйб

э іахъники, песде э ошгореки эри фурухде гъоб-гъи жоб муьсинере, песде евош-евош дуьрлуьг хунере, э дес оморе пуле гьелусди гъурбу сохде эри ички, ми-дебердэ дегъниз хоней хуьшде. Песини дуьрлуьг хуьш-дере у ъурухдебу э эхири рузгъой дуьмуьн сал корсуь-зи хуьшде, э имидевоз, егъни, эзуни чигъо гене мибу, мивосдоьу гуфдире. Дие эри фурухде э хуне чи не демундебу. Е хуьрде куьгъне кровать э шудевоз пур бугъо, не е кок хурде куьгъне стол, комигъоки екиреш герек не бу, лап э бугъой ним литир эрэгъи хунеиш.

Раби гешдембу эз и э хуьшде не дерие сер-сонгъоре хуно, гъовдол хуьрд-хэсде, чуьлки, эз куче гиросдеки буй эрэгъ ве мурдали оморембу эз жендек ю. Партал рабире шушдеабугъо Мурум, пире зен, диренге пул-суьзи рабире, дге шушде э герде не вегирд.

Шинохдегоргъо ве куьнде одомигъо, е эз езугъбери, енебуге эз де себебиге, мидорут хуьрде пул, раби гьелуьсди миофд хъэрмэхъгъо, тойгъой хуьшдере, мивосдорут е-дуь-се одоми е шише шороб, гъе э унжо векенде, лерзире-лерзире эз и гъиздирмелуьгъоре хуно, э тешнеиревоз мивешенд э ю расиренигъо бэхш ичкире. Э пивнойгъо дире тешнеи рабире эри ички, кимигъо декуьрде мидорут е пейле-ним пейле, коми-реки у сер-соне хуно гьелуьсди э тешнеи ве темерузи-ревоз вешенде пейлерэ, э гъуловней шеиревоз мипокурд ловгъой хуьшдере. Оммо и песини гиле, офдоренге э хуней ишори милиция, ве суьгъбет сохденге э управ-дом хуьшдеревоз, екиш уре ички нидорут эри хурде.

У вэхди, де чорейге не бире, рафдени у э ён бирор-хэгъер хуьшде, комигъоки, э бед-бэхди ю гуьре, лап кем бируьт. У сер гирдени угъоре эри имид ве бовори-ни доре, ки де ю гъич ичкире э буз ни венуь гуфдире, ки и песини гилеи. Ишму, егъни, екем пул дит, сери-тени мере сохум, э кор дерам, те дире-бире вес мисо-ху, эз чоресуьзи кор мижелети мисохум. Гъеме хуб биренге, мидарам гене э рабиетиме, де у зэхъримоне

ни хурум, хьюрмет гээзенмиш сохде э селиггээр^эвоз мисохум рабиети мере. Не ишмуреш биебур сохда хижолети нигьилуым кешире, не хуышдереш зигу пойнисохум. Минет сохде, гирисде-гирисде гуфдирени, эз и дурьюсде хьэлоле одомигьоре хуно, гуйге э ю не дур дери не энгуыл, ю гьисди пок, темиз, чуи молэх, темизе шир хуре глэиле хуно.

Э у бовор сохде, хэгьер-бирор кура сохде дорут е кем пул. Гьетте эз гьопуй эн угьо согъбши гуфдире ведиреморе, рэхь ю бисдо э лой духон. Дуь согъэ руз «кейф», «хьэз» ве «хьюзуюр» сохд у, ташней е ченд рузи хуышдере хуурд сохде бэгъдо, у гене рафдени э «хижолети» ве «могъбулиривоз» э тараф бирор-хэгьер, офдоре э сер дуь сугьре зани, аз и езуггьоре хуно, сер гирдени эри минет сохде э уьо ве бэхшлемиши хосде эз угьо, ки ю э хосд-воисд хуышдеревоз не сохди, юре шэхьиту эз сер ведешевде берди хорунде. Беде нефс гээлифо эз сер ведешенде гээлет сохди юре, бигьили худо ю соху дивун юре эенер ю ебойге рэхь эн угьореш рафдге, э куьнди духон неки, гьич эз у кучеш гирошдгеш. Ме, егIни, хьозур бируым эри э кор дерафде, шэхьитугьо оморе, эз хуне огол зере ни бердге юре. Игиле ю эз сер тирой Мяши нивэхуьзуь угьоре эри жогъоб дореш. Синемииш сохит и песини гиле, омбор нэгI, эри е дуь рузи, уажо э жиге кор, эз кес э дес гьэрди не хогьум.

Бирор-хэгьер рэхьм бери сохде, вечируьт гене доруьт е кем пул. У зиеди хуышдере сэгIэр не доре, те себэхь и пулгьореш верасдени.

Дие эри рафде э хуней бирор-хэгьер руй не бу. Гьеме рэхьгьо бесде оморебу. Е ченд гиле сер хуышдере куфде, э гьэриш нимаз михьиллои хосдени эри сохде гээлетие коргьой хуышде, дорени шовгIой тубономе, оммо унжош уре екиш э гуш гирдегор не бисдо...

Хэбер бирени у эз хов нимешеве, тешне, бугъоз ю хуышг, ловгьо ю гьэм-гьэми гирде эз тешней ички.

Гьете тик нуьшде э сер кровать у дирени э сер стол
чуьме шишелей эрэгъии, зу шенде хуьшдере э сер
шише пеленг э сер талаш шенуьгьоре хуно, дапарун-
де шидере эз сер стол, пешму бире эри тэгидин хуьш-
де, диьнге тигъи бирени шишере. Песде ведироморе
э хьэет, келе темэхьэвоз гьенжирени е бонке хинике
глов эз чр билогъ. Гене уш бегьем ишор не сохд, уре
егъин вьсденбу ички. Э же бурав и вэхди?..

Шегър э мусалати ве олхоиниревоз хисиребу эз
жофой ръи...

Имидсъзи гирде раби Овруме, вогошде дерафдени
э хуне. Нчогуэ мувэхь раби эдембу чоре гешде. Гье
еки э чумо вохурдени дефдер ве гьэлем мерекем, ко-
мигьоки пшотегьо герек биренбу юре эри нуьвуьсде
питик-хьэйдэл эри э руй тиро денишире оморегоргьо
ве эри гьэ-хьисоб хуьшдере нуьвуьсде э дефдер хо-
негьой нимз. У нуьшдени э гьирогъ стол, е кем глов
декирдени эмерекемдеки ве сер гирдени эри нуьвуьс-
де. Тимор схде сифет хуьшдере, ухшеш зере э поке
одоми, нефе вокошире, денишире э сергьови чуьн
муьхькеме. Ёбинлуье фикир бирегор, сер гирдени эри
нуьвуьсде:

«Руз эхэйр бу, Худой ме!

Э боворини ве имидлуьиревоз руй биренуьм э Иш-
му. Э гурундегуьнегьго гьэргъ бири, гьул Ишму. Эз
у хотур поисдэ сугьре зани, э пушой гьемей дуьнье-
гье дире ве пьмунденигьо чумгьой Туь, минет сох-
де хосденуьм мхьиллои ве кумеки, Худой ме! Чуьнки
кими одомигьо, комитгьореки Туь дорей бэхш эз эгьуьл
худой ве ихьдбор сохде дорей ишуре ихдиёр э сер
жэгмет, эз нуиней Туь сохденуьт бишэгре, лоигь-
сузе коргьо э гер тараф. Нисдуьт угьо э гьэйгьуй
рэгьнет, гуж ние веноренуьт э хуьшде метлеб хэлгъэ

эри веровунде. Энжэгъ гысдуьт э фикир хьэз ве рэйф сохдей эз нуминей Ишму.

Ини тубонемей ме, шинов Худой ме!

Лап чубкелеле, паздегьсале мундем, етим, бѣсуьз. Шинире буьзуьрге сес Туьре, ме рафдуьм э хуей Туь эри хунде, «Гуьногьсуьзе, молэхэ хуно пок, шр хуре, соворе гѣиле хуно, темиз бируьм. Ме эз буйэн у зэхьримониш терсиренбируьм. Е ченд гилегьогъэлифо, э лезет венгесе мере, эрэгъи-шоробе тэгриф дори, гене фирмунде не оморем. Гиросд салгьо, м э хуней худо, гьул бире, гьеме коргьоре сохдум: зару зере, руфде туз сер гьихэле мивегирдуьм, мижает мибесдуьм куьгьне жундуре тирогьоре, унжо уте сохдут мере э офирейгьой туьревоз. Ме верасирем ки Туь, энжэгъ Туь офирей дуьньгье ве угьойгреш, гьечу гьисдиш — гьисди. Эз у гьэдерсуьз бэхдеере эгьуьлгьой туь, гьимиш не сохде, хьэйфбери некешире, дорей мере дуь э песой еки. Кем-кем ме вѣасирем дуьруьсди ве расдире, комиреки Туь э мирси гьишдейгьоре, меш бирем раби.

Сохди мере хьуьрметлуь э гьэриш жгмет, бэхдевери хори рихд э сер ме. Мере сер гируьт эри огол зере э шори ники не мигидгьо, э овилонегьо не мегьер, э тефлим не пидуьм, э мило не боухо, э тологь не мол куьшде ве диеш, ве диеш...

Оммо, бэхшлемиш мисохи э гьул уь эри очугь дузире гуфдирей, гье эз умогьоевоз ом э сер ме дуь э песой еки и бед-бэхдигьо... Ме миесдум сохде э буйругъи туьревоз мере не воисде коре. Оммо ме сохденбируьм, чуьнки гьемей эн угьо э десдн дес Туьревозиш нуьвуьсде не оморигеш, э буйругъи Туьревоз нуьвуьсде омор. Хуьшдени туь фикир ох! Э овилхоне миѣ бурав, борухо сохде гьуьдиш хур, бирени ужире рузгьо раби э се-чор жиге миѣ бурав. Туьш дануьсдени, е одомире чор пейле эрэгъи-зэхьимон весси эри гиж бире. Эз у бэгъэй, чуьле сенгьдегендеи, шорини-

гІэруьсини, мегьри, милои, пидуьми, гьемей эн и кор-
гьо борухосуьз нисе бире, борухо бире гьисди ичкиш
миё бу, чуьнки угьо э еки хьовируьт, лап сигьде би-
роргьоре хуно.

Эгенер не рафдуьмге жэгІмет инжимиш бире. Раф-
де борухо ни сохдумге, Туьш эз ме бирази мибисдори.
Мидануьсдуьм-ми ме эз гоф туь ведарафде? Гьел-
бетте, нэгІ. Меш гье гьечи кем-кем дэгІэм юре дире,
хош оmore, кейф ме куьк бире, ички-баз бирем э хэто
демундем. Ини гьемей тэхсир ме, де мере тубономей
гІуьмуьрлугьи.

Эри... э е мегьр, хуб хурде-хорунде бэгьдо, тэклиф
сохдут э ерсаяд эн е ведилуье кифлет бердуьт мере.
Э угІэре, эз вешенде садграммгьо чешмиш бире, э жи-
гей нум муьрдигьо бироре гуьфдире э гьэдиш нум мун-
дигьо бироре гуьфдиребируьм, комики э ён ме нуьш-
дебу...

Ой, Худой ме! Екиге, туь не шинохе нибоши,
у делхэке хьомбол заготбазаре, э ерсоад фэгьире Хьэ-
нониил, сэхд хорунде мере э шороб эрэгьиревоз, мере
э кул веноре, шелей суьмере хуно, эз минжи шегьер
овурде шендебу э минжи хьэёт. Ебойге, пушой гІэ-
руьси э хуней эн е ведилуье онгурбогьдор, ме вемасире
и зэхьримоне— эрэгьире, сер гирдем эри гусбендгьоре
куьшде, э жигей эз бугьоз бурра, сер гирдем дуьмбере
бурра эз зиндее гусбенд. Э туь мэгІлуьмики э чуь хьо-
левоз ме эз унжо хилос биремге. Гьич гуьфдиреш
лоигь нисди. Мере эз зир тоегьигьо, дегенеги эн угьо,
де кесиге нэгІ, е туь хилос сохдей! У шев те себэхь,
моле хуно мэгІ зере, ноле кеширем.

Мидануьсдуьм е ченд гьозие-гьедеригеш гуьфдире,
оммо гьеме э пушой Туь очугь, мэгІлуьми. Мере ни-
се воисде сер ишмуре дорд дуьм, Худой ме! Офдорем
э темэхь ичкибази, э и хьол венгесдем хуьшдере. Оммо
генеш гуьногьгьой ме ченд гьэдер кемуьт эз эн угьой-
ге... Эз у хотуриш тэхсир ме ченд гьэдер сук миё бу,

чуьнки ме энжэгъ гуфдирегьой ишмуре сохдем, эз гоф ишму не ведарафдем. Имугьой хуьшден ишму бурит шэгIре, вериге э сер ме тэхсир, небуге нэгI...

Е-бо мере доен, келе раби нимаз, огол зере э ён хуьшде гуфдирени:

— Миё туь е дефдеригей хэзине дори гири, гьечи эри чум-бенди.

— Эри чуй, чумбенди? — мэхьтел мунде, пуьрсируьм ме.

— Чуьтам эри чуй? — гене мере э сер венгесд у, — Туь лап гьогъи, овоме хуно гоф сохде. Э ён иму эз финотдел одоми оморени эри веровурд сохде гелуьл нимазе, песде вегирденуьт налог, туь э у дуймуьн дефдер-хоне гьемере ни нуьвуьси, э суьфдеи дефдер нуьвуьсигьоре хуно. Угьо оморенге эри веровурд сохде, мидим дуймуьн дефдере, ченд гьэдер налог кем мивосдонут, тефигIэтире мисохим э дуь жиге.

Расдире гуюм, хьэз омо мере, эз и ихдилот, рази бисдорум. Оммо дуь сал бэгъдо, гьеме ошгор бисдо, чендгьэдер пул не доребиримге э зиедие мэгIмеле юревоз дорим хуькуьмете. Оммо и коре жэгIмет гьич дануьсдеш не дануьсд. Ме у вэхди гобой нимаз бируьм.

Гьелбетте, ихдиёри ишмуни, буьзуьрге Худо! Оммо мереш дануьсде воисде, эри чуй ишму энжэгъ мере тэхьно жозе дорениге? Бегем ме, дуьруьсде гьул ишму, э дузи не э бовориниревоз, эз дуьли-жуни гьул-лугъ не сохдем ишмуре и ченд салгьо?

Бэхшлемиш сохит ишму, Худой ме, эгенер э вэхд туьнди ме, эз хуьшде визор бире, гIоси бире, гьер чуй гири гуфдиремге. Мере тубономей гьозор сали де не сохдени.

Имугьой ме гьеме тэхсиргьой мере гуфдирем, ишмуш дануьсденит гьеме гIовунгьо ве элчэгъигьой мере. Хосденуьм эз Туь, Худой ме, е ники сох эри ме. У кор эри ишму гьичиш нисди, оммо эри ме зин-

дегуни мени. Мере пушой муърде рузи ме сэхд гереки. Ишму уре э жиге овурдитге ме мидануым зигьисде, чуьнки ме гьони зир пой, элчэгь бире, хок бирем.

Худо! Расунит эри ме е пенж гьозор монет пул! Эгенер ишму э е ченд себебгьо гуьре унгэдере э ежигереки расунде нисе дануьсденитге, белкем унгэдер нэгьде пул нисдиге, увэхди е пенжсад монет фуьрсит, эгенер уш минкин нисдиге, увэхди пенжогь монет семе фуьрсит, чуьнки де гьич минкин нисди.

Туь, буьзуьрге худой ме, теки, де мере нисди ужиге имидлуье ве боворине жиге. Э ишму, энжэгь э ишму руй бире, э боворини ве имидиревоз, чуме рэхуьм, не буге гIумуьр гьул ишму пучи...

Дире фикирлуьи ве гьэйгьу кеширеи ишмуре, белкем оворе сохдит беде руьхьгоре, гIэлбуьсгьо не шэхьитугьош дес вегирдуьт эз ехэн ме. Гьемей мундигьо гIуьмуьр мере э рэхь ишму суьперде, ишмуре тэгIриф доре, бирегьменд мисохум, худой ме!

Ебойгеш минет сохденуьм э ишму, э гьэйгьуй ме мибошит, мере эз чум нишенит!

Боворине гьул ишму раби Оврум*.

Деноре когьозе э конверт сэхд сохде бэгьдо, нуьвуьсдени адресе: «Э хьофдимуьн тебэгьэй асму. Эри Худо». Песде конверте дешендени э ящик почти.

Е руз бэгьдойге почтальон и когьозе овурде дорени э управдом эн и мэхьэле. Унжо кура бире корсохгьо хунде хэйли хэндуьсде бэгьдо э коргьо ве фендгьой раби Оврум, теклиф сохденуьт эри пул вечире ве кумеки сохде э раби Оврум, э вогьнеки эз нуминей худо. Кимигьо мигуфдируьт белкем эз расдиш и мерд тубо сохд ичкибазире ве вогошд э рэхь инсоньети, кор сохд э гьер-жой бисдо. Кимигьойге мигуфдируьт, егIни, гуьрг гье э лой више миденишуь. Гьэрез ки корсохгьо кура сохдут чуьл монет ве дешендуьт эри раби Оврум.

ЕгІни, и суьфдеден эз худо оmore пуле, управдом песеде эри раби фирсори.

Эз худо пул оmoreи, раби Оврум омбор дуьл шор биребу. И пулгьореш у э шори ве согъи худо хурде тешней хуьшдере хуьрд сохде, пушой пулгьо верасде, у нуьшде е когъозигеш нуьвуьсдени.

«Руз ишму э хэйр бу, буьзуьрге Худой ме!

Ме омбор шори сохдум ишму э сес эн гьул ишму жогъоб дорей.

Омбор согъ ве саламат бошит, буьзуьрге Худой ме! Ме гьич вэхд шек не мундем, ки ишму ниверовунит гуьфдире метлеб мере. Ме гьемише дошдем э ишму боворини!

Хосденуьм эз ишму, жон Худо, гьич миданитге эри ме, эри гьул ишму, е пенжогъ монетигеш мифуьрсит. Дуьимуьнжи минет ме уни ки, пуле дуз э сер ме фуьрсит, э сер управдом нэгІ, чуьнки у, гьурумсогъ, дегъ монете эри кейф-хьэз хуьшеде вегирде.

Имиде не вегирдем, чуме рэхуьм.

Боворине гьул ишму раби Оврум»...

Г Ъ У Н О Г Ъ Л У Г Ъ И

Пушой шохьонгум бу. Эз гьово эдембу чиге ворущ рихде, унегуьре кучегьо эри одоми торик ве кутэхь оморембу. Таре луйгегьой доргьо эз товущ лампочкегьой куче эдембируьт тов-тови доре, дугълегьой глов, гириге, э бешгей велггьо э зуьм-зуьме астарегьо ухшеш зерембируьт.

Юсуф, парталгьой ю эз ворущ тар, мурдал небу гуфдире, э плащ болони геймиш, эз сер билегьой куче луйнг шенде-шенде, сер гьуз, теретэгиди эдембу э хуней Овшор хьэрмэхь хушде рафде. Эгенер эз товней мерд гуфдире мибуге «раче сер», у эз расдиш рач бу: назуке сие биггьгой ю, гириге, лап гуьнжуьсдембу э, шире хуно бугьо, сипре сифет ю. Пенжогь салеш буге Юсуьф, жогьил веди бирембу, чуьнки согь гуйьмуьр хушде эри ю четин, глэзиет бугьо коре не сохдебу.

Расди, песини сал довгло уре э салдати бердебу, оммо эз углэреш е глэмел сохд омо, шеш мегь бэггэй немунд. Песде техникуме верасденге е сал э совхоз бригадир кор сохдебу, оммо кор екем гурунд бисдо гуфдире, де э кор неведарафд. Е-дуй мегь бэггьдо, е чуькле тукуле офд, рафд, алварчи бисдо нуьшд.

Э келе кориш недебуге Юсуьф, э гьэд хэлгь мэглуйьмлуйе одоми бу, чуьнки у глэмел омбаре коргьоре дануьсдембу. Буй гусбенд э гуьрг зу расуьгоре хуно, э уш «буй» эри ю хэйр бугьо кор зу расиренбу,

у гье ебо варасиренбу эз дес ки эри ю пом-пул миведировге.

Гьевел гелуър эн Юсуьф омбар биренбу, гиросденбу гӀемелдане нумиргьой ю, эз овоме, недане одомигьо, эри е войне кор, дегь войне пул векеденбу. Кими вӀгӀдо эри гьич ю не сохугьо кориш. Оммо е-дуь гиле дургунигьой Юсуьф мӀгӀлуьм биренге, овозей коргьой эн у э гуш хӀлгь дарафденге, гелуър ю кем бирени.

Унегуьре песини вӀхд Юсуф денишире диренге хӀлгьиш, гьевелинере хуно, овом, недан не мунди, дануьсменд бири гуфдире, бегьем дес вегуьрдени э «сенигӀэт» хуьшде, воисдени гене бурав э совхоз эри бригадири кор сохде, оmore Овшор ниведиромоге...

* * *

Овшоре э шегьер божӀхьэт нешинохдегор дебу. У гьевел э келе жигегьо э келе гьуллугьгьо э кор дебири. Эз довгӀо у э шегьер вогошде оморенге, гьуьндуър, буй-бухунлуь, синей ю ордингьо-мидалгьо пур, зар-зарие суьрхине погонгьой офицери э душ ю, Овшоре омбар хьуьрмет сохдебируьт. Дуразе жигей эн куьгьне ярай довгӀоиш э гьутиней ю рач дорембу уре. Суьфде Овшоре норенуьт директор эн комбинат, эз угӀӀре гировунденуьт э екем сукте кор—сервор эн цех эн завод, песде, сер берде недануьсд гуфдире, кор Овшоре сохдут деш зофру. Имогьой Овшор э завод экспедитор кор сохде.

ХьӀрмӀхьгьой Овшор э уревоз эз довгӀо вогошде оmoreбируьтгьо, увӀхди омбар минет сохдут э у, кеш бурайм э институт хуним гуфдире, оммо Овшор угьоре э гуш негуьрд. «Ме офицеруьм! — суьплове хӀнде сохде, жогьоб мидо Овшор. — Недане одомире директор комбинат нисе норе. Ме гьечинигеш хундегорум...»

Оммо хьэрмэхьгьой ю институтгьо-техникумгьо хунде верасде бэгъдо дерафденуът э келе коргьо, оmore-оморе биренуът деш звер.

Овшор, э жигей гIэйбе эз хуьшде гешде, э сер ю оmore коргьоре эз кес, эз хьэрмэхьгьой хуьшде жусде. ЕгIни, э песой ю чугъули, дуьшмени сохденуът, эри келегьой ю дуьлхуьрди сохденуът. Де нисе верасире, ки э имбурузине девр нехунугьо, коре неданугьо одоми, лап э пулевош э келе гьуллугь кор сохде, рэхь берде нидануь гуфдире...

Имбуруз себэхьмунде Овшор Юсуьфе э куче вохурденге дердгьой дуьл хуьшдере эри эн у вокурдени, егIни, чухь сохуге нисе дануьсде э тозе биренигьо директор заводевоз эри тониш бире, юре сервор отдел снабжения эн завод эри норе...

— И коре гьуьч сохдегор мибисдоге, чухьш мидорум уре, — гуфдирени Овшор боворинлуь э Юсуьф денишире.

Юсуьф денишире-диренге эз и кор эри ю пом-пул миведиров гуфдире, гье у туьтем жогьоб дорени:

— Эри. Мэш шиновусдем э завод ишму тозе директор биреире, ме шинохдеш шинохденуьм уре... Эз дуь рузиге у миё э кор ведиров.

— Туь шинохдени уре?—бовор не сохде, пуьрсирени Овшор.

— Эри, у дусд мени, э еки э салдати бирейм э вэхд довгIо, — жогьоб дорени Юсуьф. — Бинелуь у дербендини, оммо те имэхьэли у э де шегьериге главный инженер эн е завод кор сохди. Имогьой Обком уре э игIэре э директори фирсори, имбуруз суьфделе куч хуьшдере оурди...

— Де туь шинохдениге, мере кес герек нисдики,— дир не сохде гуфдирени Овшор. — Веги имишев уре э гьуногьлугьги биёр э хунейму. Кор мере гьуьч сохдиге, э жун туь, бэхшей туьш мирасуь...

— Имишев? — Юсуьф екем э хуьшде демунде, фикир сохдени. Песде жогъоб доре, гуфдирени. — Бошгу, хъэрекет мисохум. Хъозури-бозури виниш...

* * *

Имогъой Овшор не Тейло зен ю, э минут е гиле э пенжере денишире, теретэгИди эдете эри гъуногъ столе вераюнденуьт.

Тейло раче зен бу, э сал хуьшде гуьре жогъбил ве ди бирембу. Муйгъой ю гъир-гъир, чумгъой ю кову, ловгъой ю гъирмизине помад зере. Веди бу ки и зен хуьшдере хуб гъуллугъ сохде. Эгъуьл ю зиёд небугеш, Тейло эз гЮшире хуне бу. Бебе-деде э жогъбиле вэхд зиёди кор сохде хуте не сохдебуьруьтгеш духдер ишуре, э хуьшде гъуллугъ сохде, хуьшдере эз де кесиге звер гуьрде, эз пулгъо-молгъой бебей хуьшде келегеди сохдере, хуте сохдебируьт. Унегуьре, «той-тои тапар» гуюгъоре хуно, Овшор не Тейло лап дуь эри еки гуьнжуьсдембируьт...

— Эжеб хубе шороби. Директор имуре омбар хъэз миёв, — е шишере э дес гуьрде, гуфдирени Овшор.

— Келей туь тэхьно миёв, небуге...? — чонголгъо-лэгъэгъоре покурдеки пуьрсирени Тейло.

— Нисе дануьсденуьм. Э гьеркиревоз омогеш, кошки биёв. Эй ме оmore э Юсуьфевоз миёв.

Овшор вегуьрдени е куьрсире, норени э юре вогъисде жиге ве э бел тозе пинжек хуьшдеревоз покурдени уре.

— И куьрси эри келей ме, уре минуьшунум э ён ме, э игIэре, Юсуьфе э инжо, туь минуьши э улойге...

— Туь чуь сохде? Садипенжогъ монет дорей, кастум восдорей, туь эдей куьрсире покурде, — хъэрой вегуьрдени Тейло э сер Овшор. — Э кастумевоз не покурдиге, де чи нисди бегем?

— Ебо келе оmore, коргъой ме э барасд биёво,

эзуни пулгъо омбар мибу, — жогъоб дорени Овшор, метлеб э дуьл дерие одомире хуно.

Сер Тейло гъич нисе ведарафде эз имишевине гъуногълугъи. Гъеле директор э кор не ведиремори, гъич кинигеш мэгӀлуьм нисди, эз нум уруси Саша бэгъэй, оммо э гуфдирей гӀэмелдане Юсуьфевоз у лап дусде бироргилюни. ЕгӀни, Овшоре воисдени келей отдел снабжения эн завод бире, гъейсэгӀэт у жиге хэвлети.

Эз ело Тейлоре гъич имид нисди Овшоре эзимбэгъдоиге келете кор мидуьт гуфдире, чуьнки ченд коргъоре э рэхъ берде недануьсди. Эз у бэгъэй овозей Юсуьф э гуш Тейлош дерафдебу. Е гилеигеш кор Овшор э дес Юсуьф офдоре, филонгъэдер пуле хурдебу. Дуьл Тейло эз Юсуьф сохугъо кор гӀов нисе хурдембу, чуьнки Юсуьф бу дургу, Овшор ки-темэхъкор. Э метелегъо гуфдиренуьт: «Дургу темэхъкоре мифурмуну».

Эз елоиге, Тейло бовор сохдембу э пулевоз чуь коргъош сохде бирени гуфдире, эз у хотур у имид хуьшдере нисе бурра...

Тейло не Овшор э дэгъдэгъэй е гиле дуьлпесо дениширенуьт э лой пенжере. Стол вераюнде э гъуногъго дениширебу, оммо угъо чуь кориге имогъиш оmore нисе ведироморенуьт.

— Э мерд! Не омо эхи и гъуногъ туь? — тоб не доре, пуьрсирени Тейло.

— Хуней бебей Юсуьфе худо вечаруно, хуней мере вечарундге. Филонгъэдер хэржи сохдем, имогъой не омоге хуби дие, гъеме сохде хэржигъо пуч-гъич.

И гофгъо э лэгӀэ дери, сес дере куфдеи оморени. Овшор гъе ебо дере вокурдени:

— Диройт! Э сер чум ме, диройт!

Юсуьф дуьлхуьрд, хэсдее одомире хуно, диреморени э хуне.

— Туь тэхъно оморей? — пуьрсирени Овшор. — Не офди мерде?

— Нэлг. Занигьой ме хуьрд биедо эз гешде. Э жун туь, Овшор, э хотур туь нибисдоге ме ингьедер хэсдеире э герде нивегуьрдуьм...

— Омбар согьбоши! Гьелбет, дусд дусде эйчуьни? Э метелегьо гуфдирени: «Дес десе мишуру — десгьо руе»..., — жогьоб дорени Овшор. — Биё гьерки е сад грам вешеним, песеде, жон Юсуьф, инжимиш бош, сгилейгеш бура...

Юсуьф не Овшор гьерки э рюмке эрэгьин хурденуьт. Юсуьф, тэгьди не сохде, закускей хуьшдере сохдени, песеде, э эшгь офдоре, е рюмкейгеш вешендени. Чорей Тейло не Овшор мибисдоге гьейсэгьэт Юсуьфе э гужелоз эз хуне миведекуьрдуьт, унгьедер теретэгьди дебу гьеймогьой э дуьл эн угьо. Оммо Юсуьф э тегьнимиревоз, те луйгьэй хуьшдере жавуьсде нефуберуь, гьич хэёл эз жиге жуьмуьсдеш недебу. Э ногьогь э метелегьо нисе гуфдиреки: «Гьэтлуьре эз пейде хэбер нибу». Чоре небу, тоб доре гереки.

Эхир Юсуьф вэхуьшдени.

— Жон Юсуьф, хуб пуьрс, дан, белкем э хуней дусд-ошней хуьшде рафдиге, — езугьлуь-езугьлуь гуфдирени Овшор.

— Бошгу, туь олхогьин бош...

Юсуьф ведарафденге Тейло не Овшор офдоренуьт дуь э еки. Эз хьэрой, дуь екире вешмерде ве нифри-офри сохде, угьо нисе шиниренуьт сес дера куфдеире ве э хуне дироморей Содугьэ, боженэгь эн Овшоре.

— Шев ишму эхэйр бу! Чуьни бегем? Хэйр гердо, ишму суьфре вераюндайт? — пуьрсирени Содугь.

— Эри, гьуногь эдейм гузет сохде, — гьич жогьоб шев эхэйрбуре невогордунде, гуфдирени Овшор. Песеде екем э хуьшде дироморенге, дес Содугьэ гуьрдени. — Туь хош оморей! Туь эже и хоригьо эже?

— Согьбоши! Эз лап хубе жигегьош, раче шегьергьош, гене эри инсон ватан ширини. Меш гьишдем э Дербенд оморее...

Овшор не Тейло дуй э еки дениширенуыт, игьо имо-
гой нисе дануьсде чуытам Содугъэ эз хуне вирэхь
сохуге, чуынки э де кесиге деbugьо жиге э келеревоз
гоф сохде нибу. Овшор эз дур сер гуьрдени эри дешно-
вунде, егІни, э игІэре, э сер эни стол имишев де кеси-
ге ние дебу, инжо е келе одоми миё биёв гуфдире,
егІни, имишевине гьуногълугъи э метлебевоз сохде
омореи.

— Гьелбет, кес ние дебу э ижире жиге, ме ки кес
нисдуым, боженэгъ туьнуым, — э хэндеревоз гуфдирени
Содугъ.

— Э жун туь, у гьэдэгъэ зери, лап суьгъде бирор
туыш медебугу, — эз гІэйби-гІори ведарафде, жогъоб
дорени Овшор.

— Э инжо екиш ниёв, миомоге те гьони миомо, —
Содугъ гьэгъри небу гуфдире, гоф сохдени Тейло.

Чорей Овшор мибисдоге, у гьейсэгІэт мидоно ми-
тасунд Тейлоре.

— Белкем омо?

— Омоге Содугъ мидарав э доруни хуне минуь-
шуь, — жогъоб дорени Тейло.

— Гьечуниге, э ме бэхшлемиш сохит., — Содугъ
вэхуьшдени эри ведарафде, оморени сес дере куфдеи.

— Эле, бебей ме вой! Оморет, эхьисобевоз... Туь
жун ме, боже, мевадаре. Туьре ведарафде виниге хубе
кор нисди, — терсе-терс гуфдирени Овшор.

— НэгІ, ме эдем рафденуым, — гуфдирени Содугъ.

— Биё э хунейге дара, — гуфдирени Тейло.

Песде гьердушу, гьерки эз ело, э гужевоз дешснде-
нуыт Содугъэ э доруни хуне.

Овшор дере вокурдени:

— Диройт, диroyт...

Эз буру диromоренуыт е келе мерд не е келе зен,
туморегьо э душ ишу. Игьо эз Гьуьбе оморет. Эри
Овшор эз е дусд ю когъоз овурдет. Диренге вераюнде
суьфроре ве гьуногълугъ сохде огол зерей сэхьиб ху-

нере, мерд не зен туморегьоре э гъирогъ норе, олхогын нуьшденуьт э ён стол.

«Иш гъечи! — суьплове хэнде сохде, гуфдирени эри хуьшде Овшор. — Ме хъэрекет бируьм божере эй пиш сохде, имогьой эри ме эз Гъуьбе гъуногъгьо оморет... Хуней бебей Юсуьфе худо вечаруно...»

— Ишму э шелегьоревоз э вокзал рафденбирит эхьисобевоз? — гье ебо пуьрсирени Овшор.

— Эри, — жогьоб дорени мерд.

— Денишит дир небошитгьо...

— СэгІэт ченди, гъэдоволим эз туь?

— Хьэшд.

— Гьеле вэхд гьисди эри нуьшде, — жогьоб дорени мерд.

— НэгІ, сэгІэт эн у дуз нисди, — зури-зури денишире э сэгІэт хуьшде гуфдирени Тейло, — Бисд минут э яздегьи кор сохди.

— Эле-е-е! Иму дир бирейм ки. Имогьой чуй хуби? — гуфдирени келе зен э лой мерд денишире.

— Де гъечуниге, зен, гье игІэре михисим мирайм. Эз инжо зиёдте жиге нибу, — олхогын мисоху келе зене мерд.

Овшор, сурсоне хуно, дендунегъижи сохдени. Песде э вогъней дес шушдеревоз, ведебердени зен не мерде э хъэьт. Тейло эз илоиге э сарай жиге сохдени и бивэхде гъуногъгьоре э угІэре эри нушунде, оммо келе мерд не келе зен, хуьшдере э кари веноре, гене вогошде дироморенуьт э хуне. Овшор не Тейло егилейгеш минет сохденуьт э угъо вегошдуьт, э сарай нуьшуьт гуфдире. Оморени сес дере куфде.

— Омо эхьисобевоз! — гуфдирени Овшор. Песде чаруьсдени э лой мерд не зен. — Вэхизит, тэвэгъэ сохденуьм. Вэхизит э доруни хуне дарайт, инжо миё келей ме биёв.

— Эле! И биёбури бисдоки, — бирази гуфдирени келемерд. — Кеш, зен, имуре инжо кор неде.

Овшор не Тейло гуьрденыт пушой бивэхде гъуно-гъгьоре ве нисе гъишденуьт угьоре ведарафде. Песде э гужевоз, гъуьл додоре, дешенденуьт угьореш э доруну хуне.

Овшор вокурдени дере эз лой хъэйт. Дироморени Юсуьф.

— Не офди? — жингире хуно хэбер вегуьрдени Овшор.

— Ме гъеле сес гофе-гоф шиновусденге эз лошму, шор биребуьруьмки. Гъечу дануьсдуьм келей туь инжой, — жогъоб дорени Юсуьф.

Тейло хэсдере хуно нуьшдени.

— Э хунешу рафдебири? — гене пуьрсирени Овшор.

— Ингъэдер куфдебируьм дер эн угьоре, зен гъунши ведиромо мугу не дери э хуне. Пуьрсуьруьм эжеи, гуфдики, зен ю э гЪилгьоревоз э хуней дедешу рафди, шуьвер ю э хуней боженэгъ хуьшде...

— Боженэгъ?! — жингире хуно, хъэрой сохдени Овшор.

Эз сес Овшор эз доруну хуне ведиреморенуьт Содугъ ве зен не мерд.

— Туь э меревози? — пуьрсирени Содугъ эз Овшор.

Юсуьф суьфде махьтел бире дениширени э Овшор не Тейло, песде чаруьсдени э лой Содугъ:

— Содугъ?! Саша!.. Туь инжой? Ме туьре эз гешде гьолок биремки! Туь чуьтам оморей инжо? — Юсуьф чаруьсдени э лой Овшор не Тейло. — Ишму э ки дениширейт? Ини келей туь, Овшор!

Овшор не Тейло гьердуьшу, гъэргъ бире, поисденуьт э жигешу.

„Х Ъ Э Л О Л Е М Е Р Д“

Имогьой мешинохошит, ишму кура Шевениёре нешинохде нибошит. Гуфдиренуьм—нешинохде нибошит эз хотур эн у кор нэгI, гуйге е вегирлуье, хьохмолуье одоми бу гуфдире. НэгI. Хуби, гIуьзетлуьи эри эн у, коргьой гуьгьоре хуно, эз ки худош неоморебу. Э песой муьрде гоф сохдеш хуб нисди. Оммо гуьом эришму, омбар нелоигъэ, бедгIэсуьле, темэхькоре мерд бу. У гьеле е бисд-си салигеш мимунд мигешд э и гIуьлом эгенер ужире усоле, темэхькоре одоми нибисдоге. Чуьнки кура Шевениё шасд сале келе мерд бугеш, эз е паре жогьилгьош жогьил веди бирембу. Буй-балай эн у тип-тик бу, сифет ю — шумол, гьич е тикелеш гьуьж недиреморе, чум ю тиж, гуйге сенгъэ сула мисоху, рушгьо ю сип-сиёгь.

Гуфдиренуьм, кура Шевениёре нешинохде нибошит, чуьнки у согъ гIуьмуьр хуьшде э базаргьо, э пушой эн тукугьо-магазингьо муьрдебу мунде. Эз хотур е чум ю кур бирей у хуьшдере инвалид, шуькесд гуфдире гьич э гIуьмуьр хуьшде кор несохдебу, жофо, зэхьмет некеширебу, эз пэхьники, эз зир дес алвари сохдембу гешде. Хьэрмэхьгьой эн у омбордекигьош э колхоз кор сохдембируьт, кимигьо рангчи, демурчи бируьт, кимигьойге э довгIо жун ишуре э жэнг эри Ватан доребируьт. Оммо э пире вэхд уре не дусд бу, не хьовир. Чуьнки хьэрмэхьгьой эн у денишире диренге, ки кура Шевениё э дуьзди-дургуниривоз зигьисде, угьо эз

у рэгд, дур бисдоруыт, эри эн угъо хуърди, элчэгъи оморенбу э ижире одомиревоз эри хъовири сожде, дус ди гердунде. Оммо, эн кура Шевениё э фикир юш небу. У эз гъемме э и гъуъллом эз дусдгъо, хъэрмэхъгъо, бирор-хэгъер, эз номус, хъэе ве гъирьет пуле омбор хосдембу. Э овосунегъо гуфдиренуыт нешумой эн гъэждогъо э гъуш гъэфеси дери, оммо эн кура Шевениё ношумой ю э пул, э суърх дебу. Ю, хуышдени кура Шевениё э гъенегевоз мугуфди: Урусгъо гуфдиренуыт: «Туьре сад монет бирейнжо сад дусд бугу», оммо э гуфдиреймеревоз: «Сад дусд бирейнжо одомире сад монет бире хубтеи». Гиснее керг э хов чуьтам эрзуьре дирениге, е чум эн и э ховиш, э эвреиш гъе эдембу пуле, монете дире. Эри е чире э дуьвойне гъимет фурухде э муышдери, сер эн уре пучунде, у э гъоврей бебе-дедей хуышде шовгъо мисохд, эдее эри хуышде э зарали фурухде гуфдире. Гъемин эри ижире одомигъо гуфдиренуыт э метелегъо: «Бей мере куышдем, э гъовре ю шовгъо сохум гуфдире».

Е кепик уре гъэзенж дорегор нибисдоге, у кепике бей хуышдереш бэхширенигъо одоми небу. Эз и ченд сал пушо суьфде хэгъер эн кура Шевениё, пезде домор ю муьрдебу. Эз угъо духдерле мундебу, сиздегъ сале гъил. Духдерлере де кесиге небу эз кура Шевениё холушу бэгъэй. Чорей Шевениё небисдо вегуьрд овурд духдерлере, хэгъерзорей хуышдере э ки хуышде, егъни, э пушой хэлгъ уьзуьгъэре неведиров, биебур небу. Духдерле согъ руз, гъэревоше хуно, эдембу кор сожде э хуней холушу: руфде, вечире, шушде, гъемише э сер пой вебу. Зен эн кура Шевениё Сироти гъеми дие келе зен бу, гъеми нечогъэ одоми. Оммо суьпуьл эн кура Шевениё эдембу жэгъуьсде духдерле э хуней ю эдее е лугъэ нун хурде гуфдире.

«Чуь хэйри ме духдере эдее дошденуьм гуфдире эз зарал бэгъэй? — Фикир мисохд у эри хуышде. — Пушотегъо духдере э шуьвер доренге эри эн у пул-

рэхьи семе восдорембу. ГьейсэгIэт неки пул-рэхьи, бебегьо-дедегьо эз хуьшде доренуьт жигьиз эн духдере. НэгI... о, и духдер э хуней ме зигьисде келе бирей эри ме омбар зарали...»

Егилейге кура Шевениё эри хуьшде фикир сохд, ки э дин туроревоз холу хэгьерзорей хуьшдере хосде гIэмел оморени. «Ме и хэгьерзорей мере гьовои эри чуй нун доре дошденуьм, — мугу у э дуьл хуьшде, — мегируьм михогьум эри ме. Гьечинигеш эз Сироти дие фойде нисди, келе зени, нечогьи, э уревоз, гIэйбиш бу гуфдире, зенишуьвериш дире нисе бире».

Ижире хэёлгьо э дуьл эн у дерики, кура Шевениё вэхуьшд омо э нимаз э кин раби э уревоз эри меслэхьэт сохде. У гIэре-бир э нимаз рафдембу, э рабиревоз шинохи-дусди гердундембу. Раби гуфдиренге эз у эз расдиш э мишно вери холу хэгьерзорей хуьшдере э зени вегуьрде мидануь гуфдире, дуьл эн Шевениё хомуш, шор бисдо.

— Рэхьмере гуьрдигьо энжэгь е кори, — э хуьшде домунде мугу кура Шевениё эз раби, дуьл хуьшдере очугь сохде эри эн у, — хэгьерзорей ме чуйклелеи, сиздегьире верасди э чордегьи пой донере.

Раби гене дуьл эн уре жэгIм сохде, мугу:

— Э дин эн туроревоз духдер дуьваздегь сал не е руз эз гIуьмуьр томом биренге уре э шуьвер доре ихдиёри.

Шори эн кура Шевениёре гьэдер небу. У имогьой эри хуьшде ниет сохдебу хэгьерзорей хуьшдере э пэхьники эри мегьер сохде, хосде эри хуьшде. Оммо духдерле дануьсденге, чуй элчэгьэ, беде фикиргьо дериге э дуьл эн темэхькоре, суруле холу, рузгьой е рузгьо вирихдени эз хуне. Е хэйли вэгIдо гирошде бэгьдо мэгIлуьм бисдо, духдерле э детдом дарафди гуфдире.

Е гиле Сироти сэхд нечогь бире дие эз хьэлэв невэхуьшд. У дуь бэхшиш хэсде, нечогь эз сэгьэти, гьуьдгьуьди, лугьэшумори эн шуьвер хуьшде бу.

У э е лугъэ нуневоз гушд зене хурденбу гъемише. Се мегъиш некеши зен эн у — Сироти сэхд нечогъ бире, офдо муърд.

Сироти эри кук не гІэруьс хуьшде весиет норебу: ю муърдге тозе гъобояуре э сер эхироти ю венуь гуфдире. Эз дуьли эн кура Шевениё небу и тозе гъоборе вегуърде гъечи пуч сохде. «И гъобо э хэйли пулмирав, чуйтам денуьм пуч сохум уре?» — эдембу фикир кешире Шевениё. Дие чоре ю небисдо, эри биёбур небирей э пушой гІэйлгъо. гъунши-мэхъэле у гоф несохд, зене э гъовре сохдеки тозе гъобореш дено э ки ю.

Се мегъиш негирошд эз Сироти зен эн у муърде эйло, кура Шевениё дие э кучегъо-базаргъо веде небисдо, у дерзей Шолум-дерзире хуно, вир-сур бисдо. Э гъуншигъо-мэхъэлегъо лов бисдо, ки кура Шевениё эз зен ю муърде эйло фетге вегуърди, э хъэлов дери, ранг ю рафди, рушгъою сипи бири, е муй е мерези, эдее муърде. Омбаргъо гъечу дануьсдембируьт кура Шевениё эз хъэйф, дерд эн муърдеи зен хуьшде гуйге э и хьол офдори, муърдеи эн зен лап э остгъу-уьлуьг ю расире, зеде зере. Оммо себеб эз хьол офдореи, гурунд нечогъ бирей эн кура Шевениё эслогъ е кориге бу.

Ини гъейсэгІэт ихдилот сохум эришму.

Е шев э хов э пушой кура Шевениё э сипре эхироти дери зен ю Сироти миёв мипою, мугую:

— Эй мерд, э хуней бебей туь гІэтош дераво, туь чуйтам дуьл сохди, гъимиш сохди, вегуърди гъоборе э гъоврей ме данори?

— Ме весиет туьре эжиге овурдем, — жогъоб до кура Шевениё. — Биригъо-бири, дие пешмуни эри чуй кешире туь?

— Пешмунлугъ гоф нисд инжо, — мугу Сироти. — Ме пушой муърде фурмуш сохдебируьм э туь гуфдире, ки ме эз пэхъники туь э бел гъобой ме е ченд эршефи духдем. Угъо гъечу э бел гъобой ме вомунди рафде.

У шев кура Шевениё се гиле мивинуь и хове. Е парагьо гуфдиренуьт, бовор сохденуьт: ки е чире сегиле хов диге у хов — расди. Кура Шевениё се гиле диренге и хове, серсуре хуно бире, гъуй мизенуь эз хъалов мивэхизуь. Дие э чум эн у хов ниёв. Э фикиргьо мэхьшовогьой эн у имогьой энжэгъ у бел гъобой эн Сироти зен ю духдебугьо эршефигьо мидебу.

— Э роцогI, э нелоигъ, — мугую э дуьл хуьшде кура Шевениё, нифри-офри сохде зен хуьшдере, — туь пушой муьрде, тасирей туь эйчуь негуфдирей э ме и коре?! Туь темэхъ сохде мегири эршефигьоре э хуьшдеревоз мибери? Негьогъ э сер гъоврей эн зен се латке хок зиёд нисе вонореки.

Эз у шев эйло согъ руз кура Шевениё э думитхэёл эн пэхьникие эршефигьо дебу. Чуь сохуге ние дануьсдембу.

«Ме имогьой келе мердуьм, — эдембу фикир сохде у эри хуьшде, — ме ки согъ гIуьмуьрме не э колхоз, е небуге эри хьуькуьмет е кор несохдем. Унегуьре мере пенсия-чи дорегор нибу. Эз кук-гIэруьсиш фойде нисди. Э кукгьо-гIэруьсгьо вемуно дуьшмен. ГьейсэгIэтине гIэйилгьо гьер мерд эри хуьшдеи. Угьо энжэгъ эз бебе-деде векендуьт. Оммо бебе-дедере дошде эз угьо нисе вероморе. Иллогьки эз кук ме. У гьемише эз ме гьэгьри-бирази бу, егIни, гуйге, ме э дедей эн угьо гуж сохдем, э у е руз небирмундем, беле, филон... У эршефигьо, Сироти э бел гъобой хуьшде духде пэхьни сохдигьо, могьгуьл мере лап герек мибисдо эри пире демунде рузме...»

Ижире думитгьо, фикиргьо эдембу хурде-вегирде дуьл эн уре, гиж сохде сер эн уре.

«Чуьтам бурам ме биле э душ веноре э пушой эн и хэлгъ-хэлоигъ векенуьм гъоврей Сиротире, вегируьм эршефигьоре эз бел гъобой эн у?» — ченд бо думит, веровурд сохдембу у эри хуьшде, жингир-серсоне хуно э хуьшдеревоз гоф сохде.

...Е гиле шев торик биренге кура Шевениё эз сарай лапаткаре вегирде эз пэхьники гъунши-мэхьэле, дирешинохдегор, ведарафд эз шегьер, рафд дуз э сер эн гъоврегьо. Э дуъл эн у сегъм оморенбу, оммо темэхь эн эршефигьо, угьоре эри вегуърде уре гуйге жуьргIэт доре гъишдембу пой вечире. Э сер гъоврегьо торик бу, лос бу. Сенгъгьой гъоврегьо гуйге хуьшг, мэхьтел мунде одомигьоре хуно поисдебируьт, денишире э кура Шевениё, чуьтам у э дуьзди биёвгьоре хуно, шевнимешев омориге эри гъоврей зен хуьшдере векенде.

«Нум худой гуфдире» кура Шевениё сер гуьрд гъоврей Сиротире эри векенде, э иловле чуме-чару сохде-сохде. Е сесле э гуш эн у дарафде мунде у гъеусэгIэт хуьшдере вешендембу. Эз терс, эз сегъм ве хьэ-лежигери уре гIов-эрэгъ шиширебу. У килэхьэ эз сер вегуърде, пинджеке векенде эз тен хуьшде но э гъи-рогъ эн гъовре эри ю сук бу гуфдире.

Гъовре уже рохьо бу, вокурде оморебу. Кура Шевениё гъуз бире, дес кешуь вегуьруь гуфдире гъоборе эз сер эн муьрде, бирден киниге эз песой кемер э е зарбевоз э дуьдесиревоз сэхд гуьрд уре. У гъечу дануьсд, киниге эз муьрдегьо вехуьшди эз гъовре гуьрди уре, енебуге молкомут омори жун юре эй берде. Оммо эз кура Шевениёре сэхд гуьрдегор е гоф, е сес нисе ведиреморембу. Зэхьлей эн Шевиниё рафд, э у гъувот недомунд. Бирден у эз терс жун хуьшде е келе хьэрой, е божэхь дешенде, чуьтамиш гириге ведешенд хуьшдере эз гъэл юре буховуре хуно сэхд гуьрдегор, килэхьсуьз, пинджексуьз вирихд шуш нефес гуьрде э лой эн шегьер, дуъл юре берде-берде.

Гъэреулчи эн гъоврегьо е гъэдер видовусд эз песой эн, хэрегуше хуно бежид вирихдембугьо, кура Шевениё, песде килэхь не пинджек эн уре вегирде вогошд э жигей хуьшде.

Эз у шевевоз дие кура Шевениё э пой невэхуьшд, эз хьол офдо, сэхд нечогъ бисдо. Гъечи руз бе руз

э пушой чум хьэл бире, мерез бире, офдо муьрд. Оммо кимигьо гьечу дануьсдембируьт, у эз дерд-хьэйф эн зен хуьшде муьрди мигуфдируьт уре э берде гьовре сохдеки:

— Диренит, чуь хьэлоле мердиге: се мегьиш некеши зен ю муьрде, юш муьрд рафд э ки ю. Хьэлоле мерди, фэгьир...

Д Е Н Д У Н Е Д Е Р Д

Шегьер иму раче шегъери. Э пойне ю ковре деръ-ёгъ э зир чуьшме эдее руьгъ-руьгъ доре, э звер сер ю савзелуье догъгъо, кервугъоре хуно поисдет. Э иловлей шегъер онгурбогъгъои. Оммо э кучегъо гъобгъой эн хокорудеки гъисдигеш, чуьлк, зил-зибилиш кем нисди. Песде шегъер иму чуькле шегъери. Э гъержой е кор чи бисдо гъе у сэгIэт гъеме дануьсденуьт. Ини меселен, гуюм, директор эн завод шегъер имуре Нэхъшун Севиевиче Шафадове е гиле дендунедерд гуьрдебу. Дендунедерд э гIуьмуьр хуьшде негуьрдогор кини? Оммо эз товун дендунедерд гуьрдеи эн у е нимсэгIэтиге бэгъдо э гъемей шегъер мэгIлуьм бу.

Гъисди инжо унгъэдер гоф эн директоре дендунедерд гуьрдеи нисди, чендгъэдер эн де коригеиге. Гуш венит ихтилот сохум эришму.

Руз дуьшобот Нэхъшун Севиевич эз кор оморенге, хуб-хос э хуне э зенгъо-гIэилгъоревоз эри чи хурде. Бирден румкей коньяке э буз водореки, гуйге дендуй эн уре э е келе гъуигъэвоз киниге дено сула сохд. Эз дорд дореи, эз гъэзоб эн и кор чумгъой эн Нэхъшун Севиевич лап э гъофо ю верафдуьт. (Чумгъой эн у гъечинигеш келе бируьт. Уре «буьхъуьлуье» чумгъо гуфдиренбируьт. ГъейсэгIэт гуйге гъерки эн угъо ченд е пейле бисдорут).

Шафадов гъутиней хуьщдере гуьрде э десевоз ноле зере-зере рафд дегешд э хъэлов. У гогъ э дендуй хуьш-

де одеколон декуьрд, гогь лэгIэре пара сохде жуьх гуьрде лугуре доно э донду. Оммо дорд дореи эн у не-поисд. Гуфдиренуьт: киниге дуьшмен хуьшдере нифри сохденге гуфдиребу эз у: «Туьре вином сад сал гIуьмуьр гердо, навад сал дендунедерд гирош». Ингъэ-дер беде чини и дендунедерд. Гуйге раггьо-ришегьой эн сер, лэгIэй эн уре э келбетиревоз киниге эдембу эз бине кешире ведешенде, ришегьой эн темиз сохде жэгIэ кешире ведешенденигьоре хуно.

Согъ шев небеледе раби куьшде керггьоре хуно пар-пар сохд э хьэлов директор. Е мижелеш чум эн у э хов не варафд. Не екиш э хуне эз ноле-тартапили эн у хисире недануьсд. Э гъэд эн е шев гъутиней эн у шиши-вамаси нун тонуире хуно. Гъутиней хуьшдере э деспокуревоз бесде, себэхьмунде Нэхьшун Севиевич, уьгь зере-зере, лойлум хурде-хурде, эз и сэхд эз гъуеот офдоре одомигьоре хуно, рафд э поликлиника.

Э поликлиника дендуй эн директоре темиз сохдуьт, дерму декуьрдуьт, э блombавоз сэхд сохдуьт. Е сэгIэ-тиге бэгъдо у шори-шори вогошд э хуне, эз деде бирере хуно. У эз денду рэхъэт бисдоки, э чум эн у хов омо. Суьфделе Нэхьшун Шафадов дегешдебу эри форигъэти вегуьрде, бирден сес эн зенг телефон омо. У вегуьрд трубкаре, гуш дошд.

— Нэхьшун, руз туь эхэйрбу? Чуьтами дендуйтуь? Ме эз же дануьсденуьм туьре дендунедерд гуьрди гуфдире? Эри ме зен ме гуфди, у э поликлиника кор сохде. Хуб бири гуфдири? Тозе эз деде бирере хуно? Омбар хуб. Дие согъ боши. Шохьонгум мивохурим э еки...

Э дусд хуьшдеревоз гоф сохдки дуьл эн Нэхьшун дисш шорхуьром бисдо. Вамасире гъутиней эн у гьеле ненуьшдебугеш, екемлей дендуй эн у гьеле дорд дорембугеш, гьовсй эн Нэхьшун хуб бу, куьк бу. Ловгьой эн у эдембируьт эз хуьшде хэндуьсде.

Шафадов оморени э сер диван эри дегешде, бирден гене сес зенг эн телефон э гуш эн у дерафдени.

— Нэхьшун Севиевич? — пуърсирени секретаршей эн у эз жиге кор. — Эришму когъоз омори эз Министерство... Дендушму чуьтами? НэгI, екиш телефон не зеребу. Согъбошит!..

«Денишит ебо! Эз товун дендунедерд гуърдеи э заводиш хэбер расири, чуьнки ме э пушой хэлгъ ведилуье одоминуьм. Эз товун е пара одомигъо муърдешуреш, дуразруй ме, хэлгъ бегъем нисе дануьсденуьт, оммо эз товун е дендудорддорей ме уже нимей шегъер дануьсдени, ингъэдер мере нум, хуьрмет гъисди» — э дуьл хуьшде э текебуриревоз, эз хуьшде шори сохде, мугу Шафадов.

Бирден э ёр эн у омо эз товней когъоз эз Министерство оморигъо. Дуьл гъеусэгIэт хэреб бисдо. Коргъой эн у э завод хуб небу. Завод производственный плане бегъем нисе сохдембу. Завод ведешенде продукция э хуькуьмет бугъо нуьшдембу. Песини гиле уре э Министерство огол зеренге эз у гуфдиребу, эри заводе рэхъберьети сохде недануьсдеи министре хээли уре эз пост директори эри вегуърде, е божоренлуье одомире эри норе э жигей эн у.

Тоб недоре, гъе э вамасире гъутинеревоз, Нэхьшун Севиевич зури-зури оморени э завод, дерафдени э кабинет хуьшде. Когъоз эз министерство оморевугъо э сер стол эн у вебу. Бомба э дес вегируьгъоре хуно терсе-терс, десгъою лерзире, мивегуьруь эз сер стол. Дуьл ю эз битоби не эз сегъм гуйге бэгIэвече эз лулей хуьшде пар зере вирихуьгъоре хуно, гъейсэгIэт учмиш мибу. Когъозе хунде мунде ранг эн Шафадов зерд, гилове хуно мибу, дуьл ю дорд мидуь, э у гене миёв дендунедерд мепичуь. У гъеле э хуне оморе не расиребу э шегъер мэгIлуьм бисдо уре эз кор ведекуьрди гуфдире. Гъе у руз шохъонгум Шафадов э хуне тоб недоре гъеми эз дерд, фикир юре эз кор вегуърдеи, гъемиге эз дендунедерд, гъутиней хуьшдере сэхд гуьрде ведиромо э куче. У эдембу чуме-чару сохде гьер-

кире бисдо эз шинохгьой хуьшде винуь, гоф соху э уревоз, дердгьо-дуьлесдигьой хуьшдере гую, екем дуьл хуьшдере очмиш соху.

Мигуиге э хэёл эн фикиргьой Шафадов дери, э пушо рэхьи эн у омо ведиромо экспедитор эн завод, е жогьиле кук. У директоре е верст дуриш мивиниге гье у сэгIэт зури-зури миомо э кин эн у, дес юре э дуьдесиревоз мигуьрд, лове э мигьровуниие хэнде веберде хьол-овхьол юре, эн кифлет юре мипуьрси, согъбоши мигуфди, мирафд песде рэхь хуьшдере. Шафадов поисд, гузет сохде кей экспедитор миёв мирасуьге э лой ю. Оммо экспедитор э ки эн у оморе расиренки, у гьич хуьшдере э диреш невоно, зе эз ён ю гирошд, гьич руз эхэйрбуш недоре уре.

Нэхьшун э могъбулиривоз хэндусде, сере жумунде, рафд рэхь хуьшдере. Е ченд минут гирошде бэгъдо мивинуь эз у тарафигей куче эдее секретарша оморе э пушо рэхьи ю, жогьил, рач, лов-гьутине ранг зере. У поисд, гузет сохде, лове э гужевоз э хэнде веберде, кей духдер эз ю куьнд бире, гоф мисохуге э юревоз. Оммо секретаршеш, у жогьиле куче хуно, хуьшдере э недиреи веноре зе гирошд эз бинсй буз Шафадов. Дуьл эн у эз мунде жигеш хэреб, догъуногъ бисдо, дендунедерд ю гужлуь.

Ме и коре, э сер эн Шафадов омorigьоре диренге, воисдембу мере хэрой сохум, поюнум секретаршере, гуьом эз у келе-келе:

— Эй хунехэреб нисди, екем семе рэхьм биёвгу туьре, и дендуй эн и мерд эз расдиш эдее дорд доре эхи!..

ПУЧЕ ЗИНДЕГУНИ

Эз расдиш, дуьл инсон э торике мугъоре дери, дире-шинохде нисе бире. Согъ гIуьмуьр мизигъи, муьнуьк хьэрмэхъиш михури, оммо гене бегъем нишинохи юре... Гъечи гуьфдиреинжо... ихдилот сохумгъо хуби.

И гъозие-гъэдер э сер пире зен, хоригъой хьэёт имуре жару зеренигъо, холей Басмат омори. Гуфдиренуьт у э огъилигъой хуьшде омбор раче сер бири, юш бие зен, э шуьвер рафди э е гIюшире пире мерд. Е сал бэгъдойге гъишде эри холей Басмат соворе гIэиле, пире мерд рафдени э ён рэхъметлуье бебешу...

Зигъисдембу холей Басмат э эхир дузе жевгълуье куче, э е чуькле утогъле. Дуьрлуьг холей Басмат бу: е куьгъне кровать, чуькле шкаф ве е чуькле гиргине стол, э сер комики у чи хурденбу.

Хэржи эн у диеш селигъэлуь бу. Холей Басмат эз базар гешде мивосдо лап ужуге чире: хьэле помодуре, буй гуьрде силодкере, гушде гириге у эз и нисону, те и нисону овурдембу. Е гиле у хуьшдере омбор нифри сохдебу, эри эз базар пени восдореи, э магазин ужугте биреки жиге. «И хэре сер мередениш ебо,—фугъунде-фугъунде гуфдирембу у э хоригъой кучере жару зереки, — хок э сер чуьн мени сер, гъечу мибу дие... недануьсдем». Оммо эз партал гъе эз дури шинохде биренбу уре. Вокурденбу куьгънее пелуь-пелуье партал ве э сериш бесдембу сиегъе косинке.

Сэгъэти юре дануьсденбируьт. Кими вэхд э зарифетевоз эз у мипуьрсируьт:

— Э хьисобевоз, Басмат, ишму хэйли пул кура сохдейт?

— Кура сохдем? — пуьрсиренбу пире зен. — Эз же? Эгенер мере пул мибисдоге, ме гьечи мизигьисдуьм бегем? Ишму гьечи фикир сохденит ки, егӀни, холей Басмат тэхьной, чуй хэржини уре? НэгӀэ, холе гьурбун ишму. Тэхьно гьисдуьмгеш, кеме хэржи нисди мере. Гьер руз, гуьом, е бухэнке нун миё бу, е десде савзи гереки, шекерле гереки, нефтле-спичкеле гереки, гьеле эз у хэржигьойге гьэйри... Пушотегьо, э согьи Довид кук ме э жигей хуьшде мелерзо, серитени мере восдоренбу э вэхд ю, оммо имогьой кини мере... — е гурунде ох вокоширени эз кон дуьл, э соёгь эн одомигьо, мол-девлет вир сохдетгьо. Песде, хэйли бэгьдойге, холей Басмат гуфдирени. — Ишму э хьисобевоз гуфдиренит, егӀни, холей Басмат пул пэхьни сохде. Эз лэгӀэшму мишинову эз и дуьздгьохэспушгьо, бовориш мисохут мере пули гуфдире. Негьогьие хэто миёрит э сер ме, хубе кор нисди...

— Бегем ишму эз дуьздгьо терсиренит? — э хэндеревоз пуьрсиренуьт гьуншигьо.

— Де чуй мисоху пире сер ме, эз дуьздгьо не терсире? — жогьоб дорени холей Басмат.

Эз расдиш, чуй кор буге, у эз дуьздгьо омбор терсиренбу. Гье эз соей шохьонгум, хэлгь э куче сейрек веди биренге, холей Басмат сэхд сохде летгьой пенжерере, песой гьили юре веноре, дереш гьили веноре, минуьшд э хуне.

У э кор э вогьнеки дерафдебу. Холей Басмат эз дворники гьэйри, э е коригеш муьхшул бу, мэгӀмелечи бу. МэгӀмелечи бирей эн уре дануьсденбу энжэгь е одоми-долол, эз дес комики гирошдембу кор эн у.

Гелуьр эн у бобот бу. Гьер орине, шевгьой екшоботгьо, нуьшде э пушой стол, э сер комики дегесунде

пенорембу лампей пенжире, гъуз гуърде пире сер хуышдере, хъисоб сохде дечирембу пулгъоре жере-жер э селигъэревоз, туйме-туйме сохде, гъэд сохде дено-ренбу э туморелей сатини, комики рузгъо дебиренбу э герден ю. Шохъонгумгъо, эз кор оморенге, холей Басмат пэхъни мисохд туморелере э гъэриш пилете.

Холей Басмат, рази биренге эз оmore мэгIмеле э кор ведироморембу руге хэнде, кореш э селигъэревоз мисохд, хъэйтгъо не кучере э тигъэтевоз жару зере, э гIов-гIэилевоз зарифет мисохд. Оммо у орине гелуър ю кем мибисдоге, у э екиревозиш гоф нисохд, коре гириге недуъл-недуъл сохде, е жигере жару зере е жи-гейгере гье гьечу мигъишд.

Инжире оринегъо чиш бегъем нихурд: себэхь-шо-хъонгум. Согъ орине э ох-уф мидебисдо.

Гьербо пушой хисире, холей Басмат, чуймей сер пилетере вегуърде, э мугъоети ве э тигъэтлуъиревоз мивегуърд туморере, туър-туър сохде мидено э бонилей хуыше. Кими вэхдгъо, шевгъо хэбер биренге, у гьелуъсде десе деноре э зир назбалуш бонилей хуыше мигешд уре, эри дуъле жэгIми хуыше. Шевгъо у эз дуълпесои диренбу ченд жире ховгъо. Эз хуне веда-рафденге, гъич е дэгъдэгъэш фурмуш сохде нисе да-нуъсденбу чуйкле чейтенлей сатинире.

Пулгъо дегиш биренге, холей Басмат пулгъоре де-гиш сохде э тозе садигъоревоз, э мугъоетиревоз, хъэйф оmore эри гъэд сохде, дечирени э чейтенлей сатини, ве пэхъни сохдени э доруни жиб хуыше, духдебугъоре эри олхоини дуъл хуыше, э сер сине.

Лап бежид гье э куче е небуге э кесевоз э гоф сох-деки, дес ю э дэгъдэгъэю ебо вемундебу рафде э сер сине. Оммо пире зен диренге, э юревоз гоф сохдегор дениширени, гьелуъсди сер мигуърд хуышдере эри хо-русде. Оммо гене е ченд вэхдиге бэгъдо дес ю мивебис-до э сер тумореле.

Е некумие бологъ оморени э сер холей Басмат.

Руз орине бу. Хьэёте жару зеренге, пире зен, гІэ-дотире хуно, комиреки терг сохде нисе дануьсдембу, десе кеширени э сер жиб хуьшде, гьс еки перт бире мундени дес ю э сер сине вери. Ранг сифет ю рафдени эн у жире одомигьоре хуно, комигьореки эз некуми гуьрдени дуьледерди...

Чуькле чейтенлей сатини э жиб не дебу. Суьфде холей Басмат ю э хуьшде бовор несохд. Е ченд бойгеш пес-песоеки дес зере бэгъдо, эз мэхьтели хуьшг перт бирени мунде.

— Эз расдиш вир бири? — фикир сохдени холей Басмат. — И чуьтаме кори эхи? Э куьфиге деноремге?

Дес юре гьилинже вор гуьрдере хуно, сер гуьрдени куьфигере эри гешде, э комики дебу е ченд гьэдер хуьрде пул, комиреки норебу эри хэржи. Оммо чуькле чейтенлей сатини недебу.

Пире зен э хуьшде диреморе нисе дануьсдембу. Лап хуб э ёр ю бу себэхьмунде чейтенле э жиб ю дебу, э хьэёте не кучере жару зерекиш... эри, эри лап хуб мунди э ёр ю.

— Белкем ме егІэлмишуьм, э хьисобевоз ме уре э хуне фурмуш гьишдем.

Эри эн у гьечи омоки, гуйге чейтенле э зир назбалуш бонилею дери. Э и фикиревоз, э лерзире пойгьоревоз, диреморени э хьэет, нефес ю гуьрде-гуьрде вокурдени келе килите, дерафдени э хуне. Суьфде-суьфде холей Басмат рафдани э ён кровать, зир бонилей хуьшдере эри гешде. Зир эз эрэгъ зерд бире назболуш тигьи бу. «Э же офдорибу и?!..» Сер гуьрдени эри гешде зир нимдере, гье белкем эз зир назболуш суьруьтлеме рафде дерафдиге э зир нимдер. Зир нимдере хуб фегьм сохде бэгъдо, у мэхьтел бирени мунде.

«Э зир кровать офдоре чи бириге?» — э и фикир имид дошде, у гьэлуьсди гьуз бире, нуьшдени э сер дуь сугьре зани, сере деноре э зир кровать, ведешендени эз унжо куьгьне, жундуре чемодан, дуьмсуьзе

чайник ве е хэйлиге журт-пара. Оммо чуйкле гъовлугълей сатини недебу.

— Э же мидануь сур бире и? Мэхьтеле кори! — е ченд бо гуфдире холей Басмат, покурдени э чуьлкине ейлугъэвоз эрэгъ эз пири гъуьж диреморе пушонни хуьшдере.

Дуьл эн у омбар бил-бул бире.

— Эхи хьэёте жару зере бэгъдо у э сер синей ме вебу, — фикир сохдени пире зен, генеш эри дуьле жэгИми хуьшде гешдени гьеммей хьэёте, кучере, е ченд бо зир-зевере гешде, поисде ве гешде жигей хуьшдере. Песде рафдени э ён ешиг хокору, «чуь мибу дануьсде, белкем жару зере шендемге?»...

Имогъой хэйли вэхдиш мибисдо ешиг хокору шенде не оморебу, эз буй мерг, э куьнди эн у рафде нисе бирембугеш, холей Басмат куьнд бире, сер гуьрдени эри гешде. Ю, холей Басмат, дануьсдембу инжо вир не сохдеи гъовлугъэ, генеш эри дуьл олхоини хуьшде, эз и омонети хуьшдере вир сохдегоргъоре хуно, у гьеммей ешиге, хокоруре пес-пес сохде эдембу гешде.

— Чуь вир бири, холей Басмат? — пуьрсирени гъунши, комики гьеммише, э зарифетевоз веровунде сер гофе, ёгъинире дануьсдембу.

Оммо пире зен не гуфди чуь вир сохдиге эз терс нум ю э шегъер лов бире, гьеме руьхшенд мисоху гуфдире. Ве екиге, ки бовор мисоху, э ю, косибе зен, вир сохди гуфдире е бегъеме омонетире? Мигуют, серсон бири э вэхд пири хуьшде. Уне гуьре омбор фикир не сохде, жогъоб дорени:

— Не динже гЪэилгъо хокендаз мере инжо дешендет...

— Гъо-о-о, — хэндуьсдени гъунши. — Эжеб мерди-мазаргъоют.

Те торики шохьонгум гешд у. Гъовлугъ гъич э е жигеш веди небу. Лап торик биренге, холей Басмате е виж венорени, лап эз хуьшде визор бире, эз и гиснее

одоми э пушой герме гЮщ нуьшде, оммо эз дендунедерди хурде нисе дануьсденигьоре хуно. Оморе-оморе виж жендек ю бирени гужлуь, чаруьсдени э дендунекого. «Чуь сохум, чуьжоре гешдуьм». Гьемме жигере гешди у, эхирде холей Басмат гъэриш пилетереш гешдени: чуь мибу дануьсде, белкем унжо дери? НэгI, не дери. У дие негешде жиге не мундебу.

Всмунде-демунде, хэсде-менде, э дуьлесди э сер ю оморе тенгиревоз, партал не векенде, пире зен офдорени э сер кровать...

* * *

— Чуьниге холей Басмат сур бири имбуруз, — э махьтелиревоз пуьрсирени мерд гъунши эз зен хуьшде, — Бура виниш гъери чуь сохдеге у унжо...

Зен дере куфдени:

— Э холей Басмат, холей Басмат! Вэхизит, вэхд хьэёте вечирей!

Екиш жогьоб нисе доре. Гене куфдени зен, песе гъуншигьойгеш. Гене жогьоб нисд.

Эхирде дере э гужевоз хурьд сохде дерафде диренуьт, холей Басмат дегешди э хори. Муьрди. Э ён ю, э гъэриш жундуре назбалуш ве жуьле-жундуригьойге офденуьт чуькле гъовлугълей сатинире. Сигьд дечире оморебу чуьл доне тозе садигьо. Гъуншигьо, лоле хуно, бисдорут мунд...

ПАТЕНТ

Себэхьмунде бу. Э кабинет диреморей заведующий финотдел эн район гьеле е дэгъдэгъэш не кеширебу, дер куде омо. Песде, евошлей дере вокурде, ки буге, г'Эйб оморере хуно, пуьрси:

— Г'Эмел миёв?..

Э жогъоб доре не денишире, у денорени сере эз дер. Веди бирени сифет ве чумгъой эн диреморегор, комигъоки ухшеш зеренбируйт э чумгъой терсунде хэрегуш.

— Руз ишму эхэйр бу,—гуфди диреморегор, куьнд оморэ эз стол эн заведующий.

У чуж буге эдембу нувьуьсде.

— Нуьшит,— гуфди заведующий, сере гъово не-вегуьрде. Песде э тигъэтевоз денишире э диреморегор, пуьрси:

— Чуж гъуллугъи ишмуре?

— О-о-о, бэхшлемиш сохит. Ме ишмуре э хысо-бевоз инжимиш сохдем? — пуьрси диреморегор. — Орешкови фомилей ме, сиротчинуьм... э дигъ зигъис-денуьм.

Сиротчи де гоф несохд, дениши э бешгей э мала-девоз билесумор бугъо мэхьсой хуьшде. Песде веде-шенде эз жиб линджек, э зерд бире куьгъне гозит пу-чунде оморэбугъо документгъоре, но э пушой эн заведующий.

— Мере патент вегуьрде воисде...

Сиротчи эз гІуьмуьр чуьл сала знѣдте нибисдо, оммо у пире мерде хуно веде бирембу. Сипре муйгьой эн у кидан ченд мегьиш шуне зере не оморбуге, пинджек не шовол ю гириге гьэдгьуд бу. Вини ю вамасире бу, гьирмизи бу, сифет ю шулдуре хуно, эз пиѣнискеи. Десгьою эдембируьт лерзире. Веде буки у эз и лилову недирие кергьоре хуно уре не хунен, не мескен.

Документгьой юре фегьм сохде бэгьдо, заведующий гуфдирени:

— Бурайт э ѣн инспектор, ме ихдиѣр мидуьм иш-муре патент эри доре...

Сиротчи денорени документгьоре э жиб пинджек, вэхуьшдени, оммо эз жигей хуьшде нисе жуьмуьсде. Э лерзире десгьоревоз гьэд-гьуд сохдени куьгьне шляпай хуьшдере, эз е пой э у поиге поисдени, евош суьвруьсдени э муьшд дес.

— Ме эхи хуьшдени ме оморем, — эхир э мэхьѣнефиревоз денишире э заведующий, гуфдирени сиротчи. — Э дуьл дузиревоз. Оммо гьемме мере хуно нисдуьт. Угьониге эз финотдел пэхьни биренуьт! Оммо угьо э ме мешет мибошут.

— Кигьо? — пуьрсирени заведующий, е верэгь когьозе э пушой хуьшде кешире эри нуьвуьсде.

— НэгI-o! Ме эз у товне нисе гуфдиренуьм, — у езугьлуьре хуно хэндуьсдени. — Дануьсденит, хьовир заведующий, чуьниге. Э дигь иму гене сиротчигьо дери, оммо... гІѣйб оморе мере эри гуфдире... Ме дануьсденуьм, ишму миварасит, эз товней ме нисе гуфдиренуьм... Ме гьечиш зигьисде мидануьм. Э гьонун гуьре эдем гуфдиренуьм. Хьэз оморе кимигьоре э гьонун хьуькмет гьэришу рафде, дуьзди сохде. Э метелегьо гуфдирени: «ГІуьмуьр эн дуьзд кутэхьи». Биреш гьечу миѣ бу. Расди гоф ме? Ини, меселен,.. хьи-хьи-хьи.

Сиротчи некруьм-некруьм хэндуьсдени, песде э лерзире десевоз ведешендени эз куьф ейлугьэ, покурдени эрэгь гьуьж диреморе сифет хуьшдере.

— У шуькести, чубугъиш дери э дес ю, оммо гене динж нисе поисде, гъурумсогъ! Эз и гъейсэгІэтине одомигъо сер ме нисе ведарафде! Гъемише нэгІ, оммо гогъ-бир сиротгъо зерени... Оммо э финотдел оmore мэгІлуьм нисе сожде ю сирот зере гуфдире.

Заведующий, сере гъуз гуьрде, чуь буге эдембу нуьвуьсде. Сиротчи, э гуш-гуши гуюгъоре хуно, гене эдембу гуфдире:

— Мере гІэйбиш оморени... Ишму э е одомиш ни гуит, ме э ишму?.. Ме э хотур ме нисе гуфдиренуьм... Ини, екигеш, механик эн совхоз иму. Юлдашев... Хьи-хьи-хьи-... ГІэйилгъоре кура сохдени, сирот зере. Э гъэд хэлгъ сес дери, егІни, у эри сиротгъо пул нисе вегуьрде. Ки бовор сожде э у гофгъо?! Е гиле гъечи, э вогънеревоз, ме эз у мугум: «Туь гІэйилгъоре пулсуьз эри чуь сирот зере?» И гъечи, чумгъоре чарунде, э ме дениши, мугуиге бебей эн игъоре ме куьшдем. Песде гуфди: «Чуь элчэгъэ одомини туь, Орешков!»... Хьи-хьи... Эз расде гоф хъэз нисе оmore нелогъэ! Мере воисдени: мере патент бире бэгъдо угъоре негъилит сирот зере, не э пулевоз, не э гъовои.

Заведующий дуз сохдени галстук хуьшдере, норени гъэлемэ э гъирогъ, тиж тигъгъэтлуь дениширени э Орешков. У песово доре-доре хуьшдере, рафдени э лой дер:

— Бэхшлемиш сохит, кидан егІэлмише гоф гуфдируьмге!..

Г Ъ У Н О Г Ъ

Поизи. Эз доргьой куче, воруже хуно, эдете зерде велггьо рихденуът. Е велг, э шишей пенжере вогосире, екем мэхьэл серзофруво мунде, мугуиге эдембу э у минет сохде, сэхд гируь юре, эри ю кумег бошу гуфдире, песде эз шише жейле бире, паруьсдени э сер хори.

Э бухгалтерией эн торг, пенжерей комики э лой куче бугьо, дебу сес чутке дешенде ве евош гоф сохдей зенгьо. Энжэгъ нисе оморембу сес кор сохдей сэгIэт дивори.

Лелей Мустафа, гъэреул эн контор торг, тэгIди не сохде, эдембу гирошде эз тенге гIэрелугъ столгьо, вегирдебдугьо зарплатере шуморде-шуморде. Эз зир куьгьне кечел бире килэхь ю веди бу, верфе хуно сипи биребируьтгьо муйгьо. Эз фирегье плащ брезенти, э сер дуьшлуьг э тен ю вебугьо, эденбу буй дерьёгъ оmore. Э зерд биребугьо сифет келе мерд нуьшдебу туз. Чуькле чумгьо пэхьни бируьт э зир хэсде нуьгъ-рее гьошгьой ю.

Пулгьоре шуморде, варасде бэгъдо, лелей Мустафа, донорени э куьф, оммо песде, э хэёл ю чуьниге оmore, гене ведешендени. Десе денорени гьевел э е куьф, песде э дуьимуьн куф. Эз куьфгьо, ведешенде, венорени э сер стол руштегьой чекмере, фит гъэреулире, э тигъ-гъэтевоз э целофан пучунде сиротгьоре...

Четине зиндегуни гировунди лелей Мустафа. Е вэхд, те довгIогьо, секретарь парторганизацией кол-

хоз бугьо мэхьэл, лелей Мустафаре, э чугъулигьой эн хогьингьоревоз, гьич тэхсир ю не биреки, берденуьт э гъэземет дешенде. И сиротгьо-едигор зен ве е теке гЪил эн уни, комигьоки те у эз гъэземет ведироморе, нечогъ бире, муьрдебируьт. Оммо изму, э уревоз кор сохденуьтгьо одомигьо, нисе дануьсденуьт э сер эн у оморе гъозие-гъэдере.

Ужиреш бирени: согъ девр мизигьы э инсоневоз, гьер руз эеки вохурде, хьол-рузе пуьрсире, гофиш мисохи э уревоз, оммо гьичиш нидани эз товун зиндегунни эн у.

...Е гилейгеш куьфгьоре гешде, лелей Мустафа, демундени э хуьшде. Бирден, мигуиге эз жендек ю лерз гирошде, сер гирдени э сер стол норе чигьоре эри кура сохде. Сифет эн уш гъош-гъобогълуь бу. У гьеммише гъош-гъобогълуь бу ве эз кес хуьшдере дур мигирд.

Корсохгьой контор, коре шенде, эз зир чум дениширенуьт э келе мерд. Учетчица Фатьма, сиечердее, хунширине жогъиле духдер, э эйгьомевоз, пуьрсирени:

— Э лелей Мустафа, ишму гьеммише гъош-гъобогълуьнит эхи... Гемигъошмуре Гов берди бегем?

Комини буге очугъ хэндуьсд. Веди бу игьо гъевели гиле небу, келе мерде э и тегьеревоз э кор овурдембируьтгьо.

Лелей Мустафа, гъошгьоре фушенде, фирегье дес хуьшдере э душ Фатьма веноре, жугьоб дорени:

— Туь, духдер ме, гъеле жогъили...

Лелей Мустафа, де гофиге не гуьфдире, ведарафдени. Нуьшдегоргьой контор гене кор ишуре сохденуьт, мигуиге Мустафа инжо гьич биреш не бу.

Руз эдембу варасде...

Рамазан Гаджиевич, — мугу бирден, е пуре эз салгьо миёнее зен, — эри шевхиси гъуногъ иму фикир сохде гереки э мигьмонхоне жиге нисди.

— Комини гъуногъ? — пуьрси главбух.

Чуьтма комини? Инженер холодилникгьоре...

— Эри... эри... — Рамазан Гаджиевич мунд фикирлуь, — мере э шегьер хуне нисд... Белкем туь гьобул сохди уре?

— Меш фикир сохдебируьм гьечу сохдени, оммо мереш гьуногьго дери э хуне — бирор ме э кифлет хуьшдеревоз омори.

— Чуь сохде гереки?.. Гьери телефон зенуьм э мигьмонхоне, мере э унжо е шинохэ хьовир дери. — Рамазан Гаджиевич трубкай телефоне вегирде, пуьрсирени мигьмонхоноре. — Мигьмонхоне? Мамедов? Салам! Рамазани гоф сохденигьго. Э туьревозумгьго, э ён иму е инженер омори, е кумеги сох жигесуьз не муну. Чуь? Гьичиш нисд? Гье белкем гьерчуьтам бисдо сохди, э ме гьэрд нивомунугьоре туь дануьсденики? Гьичиш...

У э хуьшде демунде, дениширени э корсохгьго, мугиге эз угьо эдембу кумеги хосде.

— Света, белкем туь мидани?..

— Ишмуш гоф гуфдиренит, — мугу духдер, эз гIэйб гьирмизи бире. — Ме тэхьно зигьисденуьмгьоре ишму беге нисе дануьсденит.

— Чуьни инжо? У жовони, хунширини, э шуьвериш мидани рафде, — гьенег сохде, мугу главбух, духдере диеш э гIэйб венгеседе.

Сере гьуз гирде, хуьшдере э нешиновусдеки веноре, эдембу кор хуьшдере сохде Фатьма. Гьемме дануьсдембируьт у э дедешуревоз э е куче, э ён еки зигьисдембируьтгьоре.

— Чуь хьэйф, меш нидануьм, — те эз ю хэбер вегирде, мугу Фатьма, — чуьнки хэлгь чу мугуют?!

— О-о-ох! — лугьонд ох кеширени главбух, — гIэйб нисди ми эриму гьуногье э куче гьишде?

Бирден э хуне дироморени шофер контор, гье эз лэгIэй дер пуьрсирени:

— Ишму оморенит, Рамазан Гаджиевич? Руз дегирди, гъовой воруши.

— Рафдеш гереки, э гъуногъэвоз чуй сохумге нисе дануьсденуьм...

— Э коми гъуногъэвоз?—не варасире, пуьрсирени шофер.

— Э инженеревоз дие...

— Уре лелей Мустафа теклиф сохд э кин хуьшде берд, гъейсэгIэтле рафдуьт.

Эз екиш гоф не ведиромо. Энжэгъ э тегьер э дуборе зиндегуни вогошденигъоре хуно, эдембу кор сохде сэгIэт дивори: тик-так, тик-так...

КЕГЪРЕБОЕ ХУШЕГЪО

Эз герми руй эн хори гуйге гъобугъ дореду. Руй эн у э зир пой одоми жэгъ-жэгъире хуно эдембу жигъ-жигъ сохде. Чуьшме эз лой дерьёгъ ведиреморе эдембу уьшуьгъ, герми хуьшдере лов сохде э гьер тараф.

Ме гье и възди эдембируьм эз ён онгурбогъгъо ги-рошде. Хушегъой эн онгур генилегъой эн кегъребоире хуно дуллу бируьт эз луьгегъой эн тегъентгъо. Э угъо денишире, ме эри ме фикир сохдум: хушегъой эн онгур э тегъер инсонгъо жуьре бежуьреют, оммо чуьшме э тегъер эн деде э балагъой хуьшде э е дуьл, э е чум дениширенигъоре хуно, гъечу гъеммей эн угъоре, тен, борбор, уьшуьгъ ве герми хуьшдере доре.

* * *

Паравоз буьруьж зере гиросд, бужу сохде сокити эн себэхьмундеире. Ме э пушой ме дирируьм балай эн е мерде. У э тегънимиревоз, тэгъди не сохде эдембу рэхъ хуьшдере рафде. Ме тен бисдорум э уревоз, денишируьм э сифет эн у. У эз гъуьмуьр е огъиле одоми бу. Сифет ю эз пири гъуьж диреморевугеш, чумгъою тиж бируьт. Эз зир э мазутевоз чуьлки бугъо шопкей эн у ведибируьт сипре пигъогъой эн у.

— Себэхъ туь эхэйр бу, леле!—гүфдируьм ме эз у. Огъиле мерд тиж дениши э ме.

— Эгъуьбет туь эхэйр бу, хэлеф ме!

— Гьечи себэхь зу-сери ишму э же рафденит?

— Э кор... э кор эдее рафденуым.

Огьиле мерд е кем э хуышде демунде, гене дубьоре э тигьэтевоз денишире э ме, мугу:

— Ме пенсионеруым. Согъ гIуьмуьр ме э рэхь машин кор сохдем. Э келе хуьрметевоз мере корсохгьой иму э пенсия фуьрсорет... Е мегь э хуне демундуым. Хьэёте вечире, темиз сохде, э жиге овурдуым, оводу сохдуым, гьомборе гьуьч сохдум. Дие де кориге небисдо зри сохдей ме. Ме э кор вердише одоми, корсуьз гьэрол негирдуым э хуне. Ме гьемише э зен меревоз э дусди, шолумиревоз зигьисдем. Имогьой эз битоби дуьл ме, эз корсуьзи э зеневоз офдорем э гофе-гоф. Ме зри ме хэёл сохдум: нэгI, гьечи кор гIэмел ниёв, чорей сер мере миё офум... Эхирки, гуюм э туь, имогьой ме гене рафденуым гье э пушотеине кор ме.

Мерд е минут поюнд гоф хуышдере. Песде лов эн у э шоре хэнде верафде, э ёр ю е хубе гоф оморе одомире хуно, сере тик гуьрде, мугу эз ме:

— Дие согъ боши, хэлеф ме, ме э кор ме оморе расирем...

Огьиле мерд гье усэгIэт чаруьсде э улойге, душгьой хуышдере тик гуьрде, жогьиле одомире хуно пой вечи бежид. У гьечи эдембу рафде, зури-зури, эз кул гурунде шеле фураморе одомире хуно, э шори, э ники эн дусд эн шинох буравгьоре хуно.

* * *

Е руз э е шинохе кукевоз, э рэхь машин кор сохденигьоревоз, эдее ихдилот сохде-сохде эз звер шегьер э зофру фурамореним. Гье и вэхди эз ён иму е келе зен, сипре муйгьо, лэгьэре сифет, хип-хуышг, нипназук, поере хуно, эдембу гирошде. Э дес эн келе зен е келе пура гьэрзинке дебу. Гьэрзинке ингьэдер гурунд бу, у гогь э и дес, гогь э у эдембу уре вегирде,

гъэд бире-бире берде. И шинохэ кук келе зене э и гу-
рунде гъэрзинкеревоз диремунде, гье усэгIэт омо
э кин эн у, вегуьрд гъэрзинкей эн уре эз дес ю.

— Эри туь гурунди, холей Несбет, ди ме миберуьм
шелей туьре, — мугу кук эз келе зен.

— Э-э-э, инжимиш мебош, хэлеф ме, ме миберуьм,
— некруьм-некруьм гуфди келе зен, гъэрзинкере доре.

Е гъэдер рэхь рафденге, бирден келе зен дес кеша,
э лой эн гъэрзинке.

— Э куьнди эн хуне оморем расирем. Дие имогьой
ди ме беруьм, инжимиш мебош.

— НэгI! — мугу шинохэ кук, — те гъопуй хуне
расире ме гъэрзинкере э туь нидуьм.

Э лэгIэй гъопу оmore расиренге жовоне кук до пу-
ра гъэрзинкере э келе зен. У э хьэет дерафденки эз
шинох ме пуьрсируьм:

— И келе зен гъуншитуьни?

— Эри, — мугу кук.

— Хубе одомиин?

— Эз же омори!.. Лап беде зени. Зугьун мари-
эбрэгьа вери уре. Гьемере эдее нифри-гъэзовоти сохде
гешде, хуби-шори эн екиреш нисе хосде.

— Дие эй чуй кумеки сохди туь э ужире одоми, —
пуьрсируьм ме э махьтелиревоз эз шинохме.

— Эвелимуьнжи, — мугу у, — холей Несбет келе
зени. Э келе одоми хьуьрмет гуьрде гереки. Ве дуьи-
муьн, мере воисдембу э и коревоз э дуьл эн у эри гъи-
рогъдеки рэхьм венгенуьм, зугьун хуьшдере эри хэ-
лоигь тэхьл несоху, эз и хубе кор ме эри хуьшде е кем-
лелей семе несигIэт вегуьруь, гIэйб биьв уре эз усоле
хосиеттьо, беде зугьун хуьшде.

* * *

Е руз эдембируьм эз ён онгур богъгьо гиросше. Пу-
шой эн онгур чирегьо бу. Рузиш лап герм бу, чуйшме
гуйте эдембу гIэтош тигьа сохде э хори. Е си-чуьл мет-

ро эз ме дурте чордогъ эн гъэреулчи веди бу. Бирден мивинуым эз гъэд эн богъ е мерд не гІэил, пура туморегъо э кул ишу вери, иловлере чуме-чару сохде, эдете ведиреморенуыт эз гъэд богъ. Эз зир туморегъо, э кул эн угъо вебирутгъо, эдембируыт дугъ-дугъ, гІэрс эз чум рихугъоре хуно, шире рихде.

Мере воисдембу зенуым гирорум, оммо э сифет гІэил денишире, пойсдуым. Сифет эн у эз герми гуне дореду. Эз эрэгъ тар-гІов бу. Веди бу шеле эри эн у омбар гурунд бу. Сиегъе чумгъой эн гІэил гІэйбе-гІэйб ве эн гІюси бире одомире хуно дениширенбируыт.

Мере э гІэил езугъ оmore, мугум эз у:

— Шелей гуьре ди э ме беруым.

ГІэил суьфде недуьл-недуьл, песеде рази бисдо. До э ме шелей хуьшдере. Е кем рэхъ рафде бэгъдо, пуьр-сируым ме эз у:

— Эз богъгъо оморенит?

Э жигей эн гІэил жугъоб до мерд.

— Эри, онгури... — песеде суьпле хэнде сохде, мугу, — екем э пэхъники чирейм, гІэмел сохдейм...

Ме энжэгъ гъейсэгІэт верасируым, э шелей эн игъо деригъо дуьздире онгургъои гуьфдире.

— Нисе терсиренит? Оmore гуьрдге ишмуре. Гъеми ишмуре эри эн и кор тембихъ мидуьт, гъемиге биебур мибошит э пушой эн хэлгъ.

Мерд гене суьпле хэнде сохд.

— Гуьрдгеш мигуьруыт. Гъэреулгъо омбари. Оммо гъелелуьге, коргъой гуьгъоре хуно, э чум садан расд не оmoreйм.

Эз гофгъой эн мерд ме верасируым, ки у э гІэиле-воз суьфдеи гиле нисе оmore эри онгур дуьздире. И гофгъой эн уре шиниренге мере омбар гъэгър омо эз у, хуни-хуни денишируым э мерд. Туморей эн онгуре э хори норе мугум эз угъо:

— Вегирит ишму берит шелешмуре.

Мерд мехьтеле хуно, мугу эз ме гьечи минет сох-
дере хуно:

— Вемундей? Гъэйгъу нибу, екемлейгеш зэхьмет
кеш, бер те шегьер, пул туьре, муьзд туьре ме ми-
дуьм.

У гье усэгIэт дено десе э куф, ведешенд е гъэм
пул, песе эз гъэм эн пул е гъэд-гъуде монете ве-
гуьрде, кеш и э лой ме. Ме дес эн уре песово шенде,
деш гIоси бирере хуно мугум:

— Туь хуьшдени туь веги бер!

Ме денишируьм э гIэилле. У сере гъуз гуьрде поис-
дебу. Ме эдембируьм дире у гIэилиш буте омбар
гIэйб, хижолети эдембу кешире шиновусде и гофгъой
имуре. Веди буки гьич эз дуьли эн у небу бебешу
уре э хуьшдеревоз э богъ эри онгур дуьздире оворди
гуфдире.

— Э гIэил семе ёзугъ биёвгу туьре. Эри эн у и ше-
ле гурунди, зэхьмети, — мугу мерд эз ме.

— Туьре э гIэил езугъ, рэхьм оморениге, дие
эйчуь берде уре э хуьшдеревоз хуте сохде э дуьзди-
дургуни, уьсделуьге э кул ю ижире гурунде шелере
веноре? — гIоси бире, гуфдируьм ме.

Эз мерд дие гоф неведиремо. Мере э гIэил езугъ
оморе, шелей эн уре венорум гене э кул ме. Те ше-
гьер расире иму оморим гьич гоф несохде э екиревоз.
Э куьнди шегьер оморим расиримки, гIэилле куьнд
бисдо эз ме, мугу:

— Дие имогъой ди ме беруьм. Омбар согъ бошит!

Ме шелере э дореки денишируьм э сифет эн гIэил.

Чумгъой эн у гъэмлуь бу, келе пэхьникие дерд
э дуьл дерие одомире хуно.

Л И Б О Н Е Н И С И М

Э ёр ишму мунди ми, гІэзизе хундегор, эз стихи-
гьой бедилуье драматург тати Юно Семенов «Озго-
рогьой куьгънегьо» :

«Гьемме руз пушой себэхь,
Либо — вен Нисим-Тирэхь.
Гуьрд мисохд гьулум-гьунши.
Мисохд нифри-гьэргьуши...»

Омо э ёр ишму? Имогьой ченд сал giroшди...

Оммо, кими вэхд, э гІэруьсихуне бисдо енебуге
э куче-дере диренге Либо не Нисиме, ме фикир сох-
денуьм, ки э негьогь ве зу фурмуш сохдейм иму у сти-
хигьоре.

Е хьовир, шиновусденге ихдилотгьой Либо не Ни-
симе, пуьрси эз ме: «Кини эхи Либо не Нисим? Чув
жирей угьо? Эже зигьисденуьт?» Чув гуюм: угьо зен-
шувер не назукуьт, не гьолинд: не гьуьндуьруьт, не
сар, не рачуьт, не бирач, не дуьздуьт, не дургу, не...
Либо не Нисим зигьисденуьт э кучей Коммунаров,
э... Слободкеш, э муьлк Хочиш, э келе кучеш, э Ма-
хачкалеш, э Масковиш, э... Эри ме оморенигьо, ишму,
хунде бэгьдо и ихдилотгьоре, эз ме зуте миофит адрес
эн угьоре...

1. ЖЕНГ

Е руз куклей гьунши нехэбереки, э вози сохдеки,
тупе шенденге. туп рафдени эз сифет духдер Либо

расире. Расиреш, сэхд не расиребугьо, свошлей, оммо эз духдер ведироморени е келе хьэрой (э вогынекиле), мигуиге, худо туь меёрош, ношумой юре ски вегирди, эдей э асму вебсрде.

Либо, э сес хьэрой духдер ведироморенге, гьич не пуьрсире, не дануьсде чуйниге-чуй нисдиге, мивидову, мирав э песой кукле, мигируь уре э зарбевоз е-дуь снгле мизенуь эз у.

Кукле мигирисуь. Либо, э уривоз дуьл ю хомуш не бире, мирав э сер зен гьунши—дедей кукле. Чогьо-ле хуно, шивен дешенде, хьэрой сохде Либо суьфде мисоху нифри: «Шуьвер-хэлеф муьрде», песде зен гьуншире дуь гоф сохде не гьишде, муйгьой юре микешуь ве, назуре хуно, эз сифет ю гьэрмэгь микешуь.

Книге, дире бедхьисоби Либоре, мирав э телефоновоз э милиция мэглуьм мисоху, ки э ижире-ижире куче еки-екире бед куфди гуьфдире. (Оринейге, эз товун э милиция мэглуьм сохдегор, э куче ведироморенге Либо гуьфдирени: «Ишму нисе дануьсденит беге, инсоне нэхогь бисдоге, эри эн у эз зир хориш шэхьиту ведиреморени»).

Либо миденишуь мивинуь — кор ю хуб нисди. Зури-зури мидарав э хьэёт, мичинуь е гиеве, миденуь э вини хуьшде ве дуь гиле сэхд мивепичуну. Гье у туьтем эз вини эн Либо хун миёв.

Хуне виниренге, Либо эз расдиш терсире, е хьэрой мисоху, мугуиге ире эз некуми биренгьине зери. Дие э иловле не денишире, у э десевоз сифет хуьшдере хуни мисоху.

Ой, хьэрой... Либоре зери? (Ки дешендиге и хьэрое имогьоиш екиш нисе дануьсде). Книге мирав эри Либо «скорая помощь» огол мизенуь.

Эз е ло мошин эн милиция омори эри Либо, эз е лойге — скорая помощь. Либоре мегьите хуно э не-силке веноре эз хьэёт э ведировундеки, комини зен махьэлеи бириге, мугую:

— Дирейт ишму гӀэмелдане Либоре, э зогӕнеки зери эз вини хуышде хун оворди!

Либо гье у туйтем, сере эз несилке гьово гирде, мугую:

— Гье эз у расди мирош э шуьверле-хӕлефевоз!..

2. ШУЛБУД

Нисим восдори эз базар е чьюкле шулбуд оворде. ЖӕгӀэ рач гьозе гьоз сохде, жарит мисоху, песеде, гӀӕилгьо не винуь гуфдире, сер юреш мивенуь. «Те Либо оmore, — мигую у э дуьл хуышде, — бурам е тириске эрӕгъиш восдонум, биёрум». Оммо гӀӕилгьоре диренге, э гьэд хуне жив зере гешде, фикир мисоху, ки эз и алуьбгъӕчгьо терси гуфдире жӕгӀэ э сер пилете вегъишде. Песеде гене хуышдере дуьл доре, жӕгӀэ пӕхъни не сохде, видов-видов мирав э туку.

Рафде-оморей Нисим дегь минутиш никешуь, оммо у оморенге, мивинуь, гӀӕилгьо, ловгьошу, сифетгьошу дуз те герден ишу гьемме руьгъӕнени. Угьо гъичиш не бирере хуно, шори-шори эдет вози сохденуьт. Гье у туйтем, э дуьл Нисим шек оmore, у зури-зури сер сковородкере мивегируь, мивинуь э сковородке гъичиш не демунди, сковородке тип-темизи, тозе гъӕлей доре оmoreе хуно.

— Эле, бебей ме вой, — хьэрой мисоху Нисим э сер гӀӕилгьс, — и жӕгӀэ чуй бисдо?!

ГӀӕилгьо, эз терс, гьерки э е куьнж хуне пӕхъни мибошут. Нисим, туйлки э сер хуруз-вече буравгьоре хуно, мирав э сер келеи кук.

— Етимчей филон-фестер, мугую Нисим, — жӕгӀэ туй хурдей?

— НӕгӀ, бебе, — жугьоб мидуь кук, ловгьой руьгъӕнире э бешгей гъул шеиревоз покурде.

— Дие коминишму гъӕним сохдит и жӕгӀэ?

— Бебешке! — мигую келеи кук, десе кешире э та-
раф эз ю чуклете гьисдигьо бирор ю. (Бебешке нум
келебебешуни).

— Элле, — э мэхьтелеревоз мипуърсуь Нисим эз
Бебешке, — е согъэ шулбуде туь пелисирей?

— НэгI, бебе, — жугьоб мидуь Бебешке, — жэгIэ
Дедешке хурди. (Дедешке нум келедедешуни).

Дедешке мивешенуь э сер чуклеи хэгьер, униге
э сер чуклеи бирор. Гъэрез сер ишмуре дорд не дуьм,
нубо миёв мирасуь э чин-чуклеи гIэил, комики гьеле
е салаш не биребу. Иллогь-филлогь шулбуде екиш не
хурди, эз и э гуфере деригьо гIэил бэгъэй.

Эхир Нисим эз пуърсире ве хъэрой сохде вомунден-
ге, эз гъэгьр дуьл хуьшде мигую:

— Э етимчегьой кутум, жэгIэ хурдейт-пелисирейт,
эз жэгI пендум зеношит, телуьгьоре семе гьишденит
дие...

3. УСОЛЕ ЗЕН

Е руз э миглей мердгьо оморе гоф вероморе, егIни,
мерд э зиндегуни хуьшде эз се чи миё терсу, хуьшдере
дору гуфдире: эз хиники, эз терс ве эз усоле зен. «Ме
эдее э Либоревоз бисд сал зени-шуьвери сохденуьм, —
мугую э дуьл хуьшде Нисим, э хуне э вогшдеки, —
эхи ме нисе дануьсденуьм зен ме хубиге енебуге усол-
лиге».

Э хуне оморе дироморенге, Нисим виниренге Либо
гьошгьобогьлуьни, мипуърсуь эз у:

— Ой зен, гьери гу винуьм, туь хубе зени небуге
усоле зен?

— Эри туь чуьтам оморе? — мипуърсуь Либо,
э жигей жугьоб доре.

— Эри ме оморенигьо усол, — мугую Нисим, екем
фикир сохде бэгъдо.

Либо гъичиш ниую, оммо э дуьл хуьшде, гъэгър вечире, мую: «Ме э туь мибурмууьм усоле зен чуьтам биреге!»

Шохьонгум, Нисим эз кор оморенге, Либо мую э у:

— Э бисдулей хъэет иму гъечи е туморе бирени картушке веремори, сэбэхь сэбэхьмунде те э кор рафдей туь, угьоре веке, миданиге.

Сэбэхьимуьн, пушой сэбэхь торики-товуши, гъеле Нисим э ширине хов дебиренигъо вэхд, Либо гъэрзинкере мивегируь, мирав э базар, мивосдону 20—25 тозе кутум, зури-зури миёру э хуне. Те Нисим эз хов хэбер бире, у зури-зури эз бисду картушкегьоре векенде, мидеберуь э сарай. Э жиге картушкегъо миденуь кутумгьоре, э сер ишуш хок мидекуьнуь. Песде мирав, мэглъуьмсуьз, мидегешду э жигей хуьшде. Сер хуьшдере эз зир луьхуьф ведешенде, лэгIэ паре сохде-сохде, мигуиге суьфделе эз хов хэбер бирере хуно, мую эз Нисим;

— Э мерд, вэхи дие у картушкегьоре веке, хъэйфи эхи, мипусу мидомуну э хок.

Нисим, гъич гоф не сохде, мивэхизуь, партал хуьшдере мивокуну, миведиров э хъэет. Биле вегирде, сер мигируь картушкагьоре эри векенде. Э е жиге бил мизенуь, эз зир хок, «Тунгъ» сохде, миёв миведиров дуьм кутум, э у лойге бил мизенуь, эз у ло «Тонгъ» сохде, миёв миведиров сер кутум. Нисим э и кор мэхьтел бире, зури-зури мидиров э хуне, Либоре хэбер сохде, мую:

— Э зен, ебо зу бош вэхи, э бисдуйму, э жун бей туь, э жигей картушке кутумгъо веремори!..

— Туь чуь хунде!?! — э вогънеки, хуьшдере э ховуьи веноре, мую Либо, — туь егIэлмиш бирей мерд, бегем э бисду кутум вереморе?

— Эри, эй, ебо вэхи виниш, кеш, кумегчи сох э ме те ме э кор рафде кутумгьоре векеним.

Чорей Либо нибу, мивадарав э Нисимевоз эри кутумгьоре векенде. Кутумгьоре вечире варасде бэгъдо, Нисим дес-руй хуьшдере шушде, нун себэхьмундеи хуьшдере хурде, э кор э рафдеки э Либо мигую:

— Те ме эри нун пишнейнере хурде оморе, е хубе гӀош кутум дери хьозур сох бигьил: е жерге гьургьут, е жергейге кутум, е жерге гьургьут, е жергейге кутум, э зир юш хуб картушке э руьгьэревоз, варасири?.. Фурмуш месох... гьо!..

Либо рази биренге, ки ёгьин гӀош мисоху гуфдире, Нисим шори-шори рафдени э кор.

Гьетте Нисим э кор рафде, Либо ведировундени эз сарай картуьшкегьоре, дешендени э бисду э жигешу, песеде вегирдени е хьэшд литире гьэжгьуре, декирдени е ниме бедре гӀовеш, е-дуй кило эрзуьреш, венорени э пилете ве сер гирдени эри гьэриш сохде.

Эз дуьл Нисим е худоре хэбери. Те пишней бире, дуьл эн у тоб нисе доре, у гье дениширени э сэгӀэт, имогьоиш пишней нисе бире. У э сэгӀэт хуьшде бовор не сохде, пуьрсирени вэхде эз корсохгьойгеш. Эхирки, сэгӀэт дуваздегь бире мунде, у шуш нефес гирде оморени э хуне ве гуфдирени эз Либо:

— Гьери веги биёр гӀоше ебо зен!

Либо е гофе дудуй не сохде овурдени э пушой Нисим гьэжгьуй нимелит дуьшире шиловой эрзуьире. Нисим, шори сохде-сохде, вегирдени сер гьэжгьуре, мивинуь эз гьэжгьу буй кутум неки, буй гьургьутиш нисе оморе. Нисим, гӀоси бире, жингире хуно, мугую эз Либо:

— Ме эхи э туь гӀош кутуми сох гуфдиребируьм?

— Эз коми кутум, беге туь кутум восдоребири овурде? — э ю не дур, не энгуьл дерире хуно, ми-пуьрсуй Либо.

— Эле, чуьтам эз коми кутумгьо? Иму себэхьмунде эз бисду, э жигей картуьшке кутумгьо векенде е согьэ гьэрзинке кура сохде, не диоровундим э хуне?!

— Туь делуь бирей, туьре чуь бири мерд, енебуге э сер туь омори, эн е парагьо оморенигьоре хуно! — Иш тозе кори!

Нисим, жингире хуно бире, мивэхизуь эз жигей хуьше, гьили дере вегирде, мирав э сер Либо. Вирих Либо, видов Нисим.

Э ён пилонгьой пассаж расиренге, Либо хьэрой сохде, мигую:

— Ой, хэлгь, гирит и мерд мере, и делуь бири, мере эдей куьше!..

Мердгьо, кура бире гьерки эз е ло мигируьт Нисиме, хомуш сохде мипуьрсуьт эз у чуьниге, чуь нисдиге, эри чуь видовусдеге э песой зен хуьше.

Нисим гьемере, лап те гюш кутумиреш, ихдилот мисоху эри эн угьо.

Мердгьо, оморе эз бисду картушкегьоре векенденге, хэндусде-хэндусде, мугуют э Нисим:

— Туь чуь гуфдире, эде, туь эз расдиш э делуь-жингир бире ухшеш зере, беге э бисдуш кутум вероморени? Веги зен туьре э хуне дера, глэйбе кори, небудие э ки екиге гуи и гофе...

— Пушой эри хисире дегешде Либо мугую эз Нисим:

— Э мерд, биригьо-бири, кими вэхд э муьвэхь одоми чуьш оморени, туь мунош, себэхь те э кор рафдей туь картушкегьоре веке эз бисду.

Нисим жугьоб нидуь «Белкем — мугую у э дуьл хуьше, ме эз расдиш егълмиш бирем, белки пир бирем, сер гирди э сер ме жингьо эри оморе...»

Пушой сэбэхь, торики-товуши те Нисим хэбэр бире, Либо гене мивэхизуь, картушкегьоре эз бисду мивекенуь, кутумгьоре э жигей эн угьо миденуь, песде мидарав, гьичиш не бирере хуно э жигей хуьше мидегешдуь. Екем вэхд гирошде бэгьдо. Нисиме хэбер мисоху мидефуьрсуь эри картушкегьоре векенде эз бисду.

Нисим биле вегирде, миведарев э бисду эри картушькегьоре векеңде. Е бил мизенуь, «Тунгъ» сохде миведирев сер кутум, эз у лойге, «Тонгъ» сохде, миведиров дуьм кутум.

Нисим, бил эз дес ю офдоре, лой-лум хурде-хурде, жингире одомире хуно, мугую:

— Кутум- картушьке, картушьке-кутум...

С Е Р Н О М Е

| | |
|-----------------------------|----|
| Хов эн Гъэдмил | 3 |
| Тубономе | 10 |
| Гъуногълугъи | 21 |
| «Хъэлоле мерд» | 30 |
| Дендунедерд | 37 |
| Пуче зиндегуни | 41 |
| Патент | 47 |
| Гъуногъ | 50 |
| Кегъребое хушегъо | 54 |
| Либо не Нисим | 59 |

Дадашев Михаил

ИСПОВЕДЬ

На татском языке

Редактор *Б. Гаврилов.*
Художник *М. Вегерчук.*
Художествен. редактор *В. Логачев.*
Техн. редактор *М. Тищенко.*
Корректор *А. Семендуев.*

Сдано в набор 21/XI-1977 г. Подписано в печать 5/I-1978 г. Форм. бум. № 1 70×108¹/₃₂. Бум. л. 1,063. Печ. л. 2,13. Усл. печ. л. 2,98. Уч.-изд. л. 2,5. Тираж 1000. Цена 20 к. СО 1751.

Дагестанское книжное издательство Управления по делам издательств, полиграфии и книжной торговли Совета Министров ДАССР. Махачкала, ул. Маркова, 55. Зак. № 1056.

Филиал № 1 Махачкалинского полиграфобъединения Управления по делам издательств, полиграфии и книжной торговли Совета Министров ДАССР. Махачкала, ул. Маркова, 51.

Цена 20 коп.

Дадашев М.

ИСПОВЕДЬ

На татском языке